

**ARC-NI
RONGTALGIPA JOAN**





ARC-NI
RONGTALGIPA JOAN

M.V. WOODGATE


Peskagipa

Fr. A. Bucciari SDB

Don Bosco Publications

Guwahati - Shillong - Tura

1996



ARC-NI
RONGTALGIPA JOAN

M.V. WOODGATE

Peskagipa

Fr. A. Buccieri SDB

Don Bosco Publications

Guwahati - Shillong - Tura

1996

ARCNI RONGTAGIPA JOAN
St. Joan of Arc
(Garo)

Published by Don Bosco Publications, Guwahati - 781 001

© 1996. Don Bosco Publications

Rs.15.00

The publishers are grateful to the Society of St. Paul for
permission to translate St. Joan of Arc into Garo

Computer Typesetting Don Bosco Publications, Guwahati - 781 001
Printed at Eastern Press and Publications, Pvt. Ltd., Guwahati

ODKAI 1
JOAN KNARONGGIJAGIPA
KURANGRANGKO KNAA

KATTA BICHONGRANG

1424 Bilsio

JAK

1. Joan Knaronggijagipa Ku'rangko Knaa 5
2. Joan Noktangko Wata 16
3. Joan Sipaini Kam Daka 28
4. Joan aro Dauphin 38
5. Joan Rasong Chae Ama 49
6. Dauphin Rajani Mukutko Stika 58
7. Joanko Am'a Aro Rim'a 68
8. Joanko Bichal Ka'a 78
9. Joanko Wa'al So'ota 88
10. Aganchotani 93

Una agreba goera guani riprapa aro mikka
kimpretani uni gisikko an'saota. Indaken ua
samsio asonge saigichiko nigitoe balmukkako
rifchakocengchim.

KATTA BICHONGRANG

JAK

1. Joan Kronggajiga Ku ranga Kras 5
2. Joan Nohanglo Wata 16
3. Joan Spaini Kam Daka 28
4. Joan ero Dauphin 38
5. Joan Rasong Chae Ama 49
6. Dauphin Rajani Mukulo Sika 58
7. Joanko Am'a Aro Rim's 68
8. Joanko Bichab Kala IS 78
9. Joanko Wa'al So'ots 88
10. Agancholani 93

100 187 - Bandung, Indonesia
 Published by PT. Sinar Baru Alfabeta, Jakarta

ODHAI 1

JOAN KNARONGGIJAGIPA KURANGRANGKO KNAA

1424 Bilsio

1424 bilsio, dingkarini somoio Joan minggipa mechik bisa saksa knaronggijagipa kurangko knaaha aro ua kurangara ia a'gilsakni kurang ongjachim ine ua masiaha. Ua kurangko Joan panganba gualna man'jaha.

Pringsao ua ma'gipa baksa antangni abani nokni andalgipa babilisio kilding rikkengachim. Babilisio namen ding'beani gimin ua an'tangni kamko matchotoa, ka'singipa balwako cha'na barichi katangaha. Barioba babilisio gita ding'beachi.n.

Ua somio andalangengachim aro Isolo bi'na sepang jolo dong'gipa giljanokni konta dokengachim.

"Mikka balwa ta'arakgen" ine Joan an'tangna aga'mituaha, maina ua ta'raggipa balmikkako namnikachim.

Una agreba goera goani riprapa aro mikka kimpretani uni gisikko an'saoata. Indaken ua samsio asonge salgichiko nigitoe balmikkako ni'chaksoengachim.

Balwa baljani gimin, mamingba illengagrichim. Do'o matrangni mikoanikoba kna'jaha, indiba gisep gisep uni sambao donggipa kobirangko dimenggipa bijani ku'rangkosa knana man'aiachim.

Ua raka kamko ka'rongani gimin rakgipa jakrangchi ja'skuko rim'e asongengachim. Uni jakrang aro mikkangba sal kamani rong ong'achim, maina uni donggipa song, Doremy, namen dinggipa biap ong'a.

Doremy Franceni Salgro Salaram jolo dongoba, bang'gijasan ua songko uitokaiachim. Indiba adita bilsirangni ja'mano ia me'chik bi'sani aiao inman'pilgipa kamko dakachi, a'gimiko ia songko uitokaha.

Joan iarangni gimin mamingkoba uijachim aro iarangna ua gisik on'jawachimkon, maina ua an'tangni gimin chanchirongjachim.

Salgioni ku'rang

Chel'beaoni mikka kimporetako knahaon Joan gam'adingding niaha. Ua gamara giljanokni nalsachini gambaachim. Unon ranggitik maiba ching'gipa uni chon'gipa bimangko aro kobirangko tengsudapaha.

Ua ken'gokaha aro illengna man'jaha. Unon rakgijagipa aro knatobegipa ku'rang una aganna

a'bachengaha. Ua ku'rang me'asani ku'rang ong'achim aro uko namgipa bi'sa ongchina aro jringnan giljachi re-china didiaha, maina ua noktango wate France-ona reroroe dalbegipa kamko ka'na re'angna nanggen.

Ka'sne ka'sne tengsuani dimelaha aro da'oba Joan saksasan ua siksikdikgipa aro mikkasingipa bario dongaha.

Ua ka'tong rongchu su'engachim, indiba ua kenjaha. Unomiting mikka wana a'bachengahani gimin ua noktangochi re-chakataha.

Joanni Nokdang

"Tarak rebabo Joan" ine uni ma'gipa okamataha.

"Mi sachieha aro nangni pagipa aro nangni adatangrangni a'ba gita re'baengako nikatenga."

"Uamang bal-mikkana skang nokona sokbagen aro tarakgipa balmikkaba ong'jawa ine anga chanchia" ine ua agandapaha.

Ro'gipa ba'rachi pindapgipa tebilu sakdokna bi'apko aro cha'aniko tariaha. Uamangara Joanni ma'a pa, uni adatang sakgni aro jinggipa saksa ong'achim. Uamang pilakan Joanna ka'saa, indiba uni ma'a pa uko agre sason ka'enga ine Joan antang aganrongachim.

Joan ku'sik aganrakgipa bisa ong'jachim. Indaken ua ma'gipa baksa kam ka'rimengoba bang'gijasan

katta aganaichim. Ua saksan dongna kusi ong'batachim. Mongsongbate ua a'bao kam'kamitingo saksan ong'na namnikbatachim. Joan me'chik bisasan ong'oba, adatangrang gita bilagipa aro ka'donggipa ong'achim.

Uni pagipao adita gurerang gnangchim aro Joan uarangni janggilo jin gri gakate, songni sorokrango re'roroe kusi ong'rongachim.

Attamo ua an'tangni kamko matchotahaon, srik srik sepango donggipa giljanoko napange, uano jrip donge saksasan dongna namnikachim.

Pilnipil ua Missachiba re'rongachim.

Salsao noksulni bisa saksa:

"Joan, maina na'a pangnan Missachi re'a?" ine uo singaha.

Joan dikdiksana jrip donge aganchakjaha. Jamano uko nitatgija aganchakaha:

"Maina - anga indaken chanchia - anga bil ama dipet Jisu baksa dongna ska."

"Ah!" ine ua bisa aiao inmane nitate aganaha. "Inditana kingking na'a Jisuna ka saama?"

"Oe, anga Una pilakna bateba ka'saa ine chanchia."

Indakoba Joan maming saloba sister saksa onгна chanchijaha. Ua maming saloba antangni salantini janggi tanganiko wate, gipin janggi tanganiko dakna namnikjachim.

Ua giticham nokni nokkingni ka-mao, gipin kuturirangoni chel.ao, chongipa dring damsа dongachim. Uano ua tusiachim aro pring sengahaon magipa uko demesajaskal ua tusie dongachim. Indiba je salo ua bario kobirangni ding-gipa aro sikdikdikgipa biapo, kurangrangko knaahachim, attamo tusina manjaha.

Rongtalgiparangni Chelchakani

Salgipino ua aro gipin nokni manderangba, pringwalni chakataha, maina ua salo, July jani 20-gipa tariko, bang-a bilsirangna skangan toromna so-otako man-pagipa Rongtalgipa Margaretko manderaani sal ongachim.

Rt. Margaret dambe piti me-tra ongmitingo siaha. Domremyni giljanoko uni statue gesa dongachim. Ia bimangko kelki-sambao donahachim aro ua kelkini ainao Rt. Katerineni noksaba gnangchim.

Rt. Katerineba dambe piti me-tra ongmitingo toromna so-otako man-aha. Joan ia rongtalgipa me-tra sakgnini gimin bangen knaahachim,

maina ua somoio France a song chugimiko
uamangko gisik ra'e mandera achim.

Joan Rt. Michaelni giminba bang'en kna ahachim.
Ua dal'gipa Sa gre mikkangchakchak Saitan baksa
dakgrike, uko amahachim.

Giljanoko Rt. Michaelniba statue gesa gngangchim
aro unsalo Joan dikdiksana uni kiddango jasku
dipane bi'aha. Unikoa ua kraa gita nitoe
kitgijagipa Rt. Margaretni mikkangko niaha.

Skango Joan ua mikkangko pilnipil nikahachim,
indiba unsalo ua mikkang skang gita ongjaha.
Rangsan ua tangchagipa gita nikaiaha,
tangchachongmota, maina Joan noktangchi
re'angna an'pilon, statueni mikgronrang uko
nitatengachim.

Ambolko Am'on

Babilsio da'oba sak dokna mi sachiahachim aro
je somoio Joan sokbaaha, uni ma'gipa okkrigipa
sak dokna pura cha'aniko tariahachim.

"Joan" ine ma'gipa okamaha;" ianona re'bae
purako brakchi wingwingbo aro anga suruako
sualgen."

Unsalo ambol chu'ongbrejani gimin wa'al namen
chingjachim, indaken suruako tarina bangbata
somoiko nangaha.

"Am-bolko nangchongmota " ine pagipa napba'e aganaha. "Abrio am-bol bangen gnang. Joan bang-gija am-bolko ra-babo. Chakka ge-sangipa jakchi salani gariko ra-angbo aro bakbakbo, maina daal a'bao kam banga."

"Oe, baba"- ine Joan aganchakaha.

Ua biapona re-angna ua namnikrongachim aro ua rangtalrangko rongtalatenba ua jrimgipa gariko ra'e bakbakan rechakataha. Ua mail gni re-na nangachim aro uchi soko burungo darangba dongja ine ua masiaha.

Sketbaket gario am-bolko gate ua nokona re-bapilnasiengachim. Unon sambao knaronggijagipa kurangni aganmituengako knaaha.

Ua aganmitua balwana mo-enggipa bolrangni gam-ani ong-jachim, maina ua somoio balwa baljachim, indiba aganmituani kurangsachim.

Unikoa ua an-tangni bimumungko okamako knaaha aro ua iako talatna man-jaoba, uni pringo mol'molgipa rongtalgipa sakgittam una agananenga ine ua masiaha.

Rt. Katerine, jeni be-enko chakao ka'e aro wilwilate bnekataha, maina ua an-tangni ka-sagipa Gitelko jechakjachim. Rt. Margareth, jean apsan a-selni gimin apsan sakna-atako man-aha aro Rt.

Michael dakgrikgipa sa-gre, salsana skangan una agangipa kurang gita uko uamang namgipa me-tra saksa ong-china aro jringnan giljachi re-china ge-etaha. Maina ua France a-songna aiao inmangnigipa kam mingsako dakna nanggen.

Skang gita ua jagipuaha indiba skango ua kena gapahachim; dao ua ka'srokachim aro gisiko ku-si ongengachim.

Franceo Mai Ongenga?

Nokchi soko a ua iarangni gimin mamungkoba aganjaha aro am-bolko chankol sambao danenba, ua sarachi ong-kataha. Uni adatang matchu nolko rongtalatengachim.

Uamang sakgnian raka kam ka'aha aro kam matchotenba, sal rakani gimin uamang bol pangsari japango asongaha aro bijimgipa bol cheksirang uamangko kameng'gipa saloniko salakimdapachim. Joan adatango:

"Jacques, France a-songo mai ongenga?" ine singaha. "Una kenchakani dongbebeama?"

"Donga" ine Jacques aganchakaha. Skangna bate una dao kenchakani banga. Englishrang jeoba amronggipa onga.

"Anga Englishrangko namnikja"- ine aganengon Joanni mikgronrang chingengachim. "Uamangko ia a-songoniko arikatode namgen"?

"Na asan indake chanchia, iade ongja" ine ka dinge Jacques aganchakaha.

"Maina uamangko arikatna manja? Anching uamang gita bilaka!"


"Burgundianrangni asel!" ine Jacques aganchakaha.

"Burgundianrang?... Uamanga sarang?" ine mikkingko dol.rikkemate Joan singaha.

"Uamang Frenchrang onga aro ia a-songni salgipeng jolo songdonga" ine Jacques talataha. Uamang Englishrangna chaka aro bil ama dipet uamangko dakchaka. Burgundianrangko sason ka-gipa Dukeni sipairang changgipa aro bilakgipa onga. Englishrangni kotokrangna bate uamang bilakbata.

"Aro anchingni raja" ? ine Joan singtaiaha. France a-songni raja maiko daka?

"Oh! ua rasong gri aro bilgri dilgipa onga. Bebeko aganode ua raja ongsrangkuja, maina dakgrikani gimin uko mukut stikatkuja. Badiaba biapo dala sonani mukut uko stikatna nangachim, indiba ua da ona kingkingba ua biapchi re-angna man-kujaenga. Ua pagipani tangmiting somoio gita, da oba Dauphin (Rajani dejakra) ongaienga."



Antang jakrangko rimkete Joan :

"Anga uko raja songatna skachim" ine aganengachim.

"Na:a?" ine ka dinge Jacques aganaha. "Na:a anchingni gisik senggijagipa Dauphinko raja songatna chanchiengama?"

Iako agane Jacques ajame beentangko kringate salgichiko nigitoaha.

"Mi cha:ani somoi ongaha " ine ua agane chakataha aro nokchi napangaha. Joan uko kising kising jarikangaha.

"Anga Dauphinko raja songatna skachim" ine Joan antangna aganmituaha.

Indiba Jacquesde uni aganako knajachim.

ODHAI 2

JOAN NOKTANGKO WATA

Rajani Dauphin

Dauphin ? Sawa ? Ua maidakgipa mande onga.?

Joan uni gimin sandiaha, indiba songni manderangni gisepo darangba uko nikkujachim. Aro pilakan ua rasong gri, bilgri, gisik senggijagipa mande onga inesan agantokaiachim.

Ua dakgrikna namnikgijagipa aro nengani aro jajrenga gri tangna siggipa mande ongachim.

Gisepo saoba saoba uona reange, dakchakako biode,

"Da'o angko jajrengatnabe " inesan ua aganchakronga Da'o rebanabe Darangba angko soso jengjengatna nangja.. Iani gimin anga ja:mano chanchinaba donga..... " ine aganchakrongaia.

Indakmitingo Englishrang bangbea cheanirangko man'engachim, maikai Frenchrangoni ka dongbatgiparangba ka donga gri ongoroaha.

Donremy, Franceni Saliram jolo ongani gimin, dakgrikram a'baoni chel'kala, indaken uano dakgrikani dongjachim. Indiba adita antirang aro

jarangni ja mano, sipairang ua songona napbaaha. Indaken Joanni ma'a pa nokoni katangna nangaha.

"Anching katanggija Englishrangko warachakna nangachim" ine Joan aganrongachim.

"Jrip dong'bo, Joan! Na'a bi'sasa ongaia. Dakgrikani gimin na'a mamungkoba uija" ine adatangrang uko manengaha.

"Indakoba saoba katchinike aganman'aha" ine Joan aganchakaha. "Bang-gija salrangni ja mano me-tra saksani dangdike on'anichi France bobilrangko amgen. Ia me-tra French kotokrangko dilgen aro Englishrangko amgen."

Iako knae Pa D'Arc ka dingsteke:

"Aro ua me-tra na'a onga ine na'a chanchia" - ine aganaha.

"Oe, gisep gisep anga indaken chanchia" ine Joan aganaha.

Da'oba Joanni pagipa aro adatangrang una kadingstektaiaha. Uamangni gisepo Ma'a D'Arcsan ka dingjaha. Ua Joanko nitatengachim.

Ua knaronggijagipa kurangko kna chengaoni bilsisa badeangman'ahachim aro Joan a'bao kam kamitingo ba saksan an'tang kuturio ba giljanoko dongon uarangko banga changna knataitaiaha.

Joanni dakgni kam

Bilsi brini ja manosa ua ku rangrang tale ua maiko dakna nanga ine parakaha.

Ua Donremy songko wate banga mailrang France a: song gita uni knaronggijagipa biaprangona songre na nangachim.

Ua biaprangoni Chinon minggipa song damsa ongachim, jeon Dauphin songdonga ine Joan knaahachim. Ua uchi re-ange Dauphinko uni killao grongna aro uko antang baksa dalgipa songjinma Reimschi uko Cathedralo Raja songna re-dilangna nangachim. Joan janggi tanga gimik "Cathedral" giljanokko pangnaba nikkujachim aro dal-gipa song songjinmaonaba re-angkujachim aro raja ong nasigipakoba grongkujachim.

"Anga banga kamrangko dakna nangsusu gita nikaia" ine ua ge-etanirangko man'enba Joan aganmituaha.

Aro salgioni kurang una agandapaha:

"Nangna bangbata kamrang sengsoenga, maina Reimschi re-angna skang, na'a Englishrang baksa dakgrikgen aro changantion na'a chegipa ongen."

"Anga dalbegipa dakgrikanio bak rapagen" ine Joan aiao inmanpilaha. Anga dakgrikani gimin

mamungkoba uija. Maikai anga iarangni gimin skigen?"

Iarangna ua aganchakningjaha. Beben antisana skangan una maiko dakna nanga, uko aganahachim chongmotan, ua Donremyko watna nanggen. Uni mamatang aro madetang Vaucouleurs sambao donggipa songo dongachim. Ua uona re-angna nanggen. Vaucouleurs Donremyoni mail chikungmang chelachim.

Vaucouleurs-o bangbea sipairangni kotok sa dongachim aro ua kotokni skotang Robert De Beaudricourt ongachim. Joan re-ange ia Skotong baksa una ong-gimin aiao inmangipa kamni gimin angangrikna nangachim.

"Angna ian aiao inmanani onga" ine Joan aganaha. "Indiba angni chanchia gita anga iako dakna nanggen."

Iani gimin ua ruutgijan Donremyko watna miksongaha aro iana uni magipa uni rangsan tik ka-ani gimin jadipchangaha.

"Ia bisa maiko dakna am-enga?" ine magipa jajachim. Ua manderangni katchinike agangimin France a-songko jokatnasigipa metra onga ine beben chanchijake! Iako chanchiode ua jara chongmot!

Aditani ja mano Maa d'Arc jajrengaha aro ua antang jajrenngako setangna parapeaha. Pa d'Arc iako knae kadingaha, indiba ja mano ka onangbee:

"Joan sripe sichina! Anga kalimjawa indiba mamung saloba anga uko sipairang baksa rerorona onjawa" ine aganaha.

Joanni Mamatang

Jeba ongchina ua somoio Joan Donremyko wate Vaucouleurchi rechakatahachim.

Madetang aro wanggipa uko ka sae rimchaksoaha aro ua mamungba nengnikgija antangni knagimin kurangrangni aro nikanirangni gimin uamangna aganaha. Uamang uni kattarangko beberaha.

Uni aganani beben ramram ongjachim, indiba jeko France a songko jokatnasigipa me-trani gimin jeoba manderang katchinike agantokengachim, uaba ramram katta mingsa ongjachim.

Uamang sko gakguenba uni aganako namnike agangrikaha aro aiao inmane uamang namchiktang, jekon bakgitchakoni uamang uiachim, uan da'o mingsingbegipa onngen ine gisiko chanchiengachim.

Sal sani ja mano wanggipa Joanna aganaha:

"Anga bil ama dipet nangko dakchakgen."

"Indide na'a ang' baksa Vaucouleurchi repagenkon" - ine Joan aganchakaha.

"Oe, je somoioba anga nang' baksa re-anggen."

"Indide an-ching knalo uchi re-gen aro uano Skotong baksa agangrikgen. Abachengon ua angni kattako knana gisik nangjawa. Indiba jamano jeko anga agangen uko ua dakgen. Anga iako tik uisoa."

Vaucouleur Songo

Iani gimin 1428 bilsini May jani nambegipa pring sao Joan mamatang baksa re-chakataha.

Vaucouleurchi soko a uamang joljol sipairangni dongramona re-angaha. Ua biap songni jatchio dongachim aro Captain de Beaudricourt sipairangni pamong ongachim.

Cholgugaranko oahachim aro adita sipairang uaranko nitimengachim. Bangbea sipairang cholguagarangni nalsachi jaku dee re-angengachim.

Joan ru'ute nitimgipa sipairangko niahani gimin, bon'kamao uamangoni saksa kadingsmite uo singaha:

"Tra, nangna anga maiko dakbo?"

"Anga ia biapo napna aro Captain de Beaudricourt baksa agangrikna ska" ine ua aganchakaha.

"Chongipa me-tra, na'a iako dakna man-ja" ine kadinggakgake sipai aganchakaha. "Ua ia kotokni commander on-ga; darangba uko grongna re-angna man-ja, mongsongbate nang gita dakpagiparang..."

"Indiba anga un baksa agangrikna nangchongmota!"

Sipai uko nitatengon Joan jakpangpil rime dongaha.

Unon sipai un sambao chadenggipa bolchagipa a'a gangipako nike, uo singaha:

"Maina ia me-tra, chingni commanderko grongna ska?"

"Ua mingsako una uiatna nanga" ine Joanni mamatang aganchakaha.

Aro Joan agandapaha:

"Nangchongmotgipa katta mingsako. Ia katta Isoloni onga!"

"Isoloni?"

Captain de Beaudricourt

Unon rangsan nitimgipa sipai sronge chadenge dal'gipa mande saksako salam ka'aha. Ua mande dal'begipa gure mangsao gakate uni mikkango dongdikachim.

Ua mande Captain de Beaudricourt ongachim.

Ua Joanko aro uni wanggipako, salam ka enggipa sipaiko nisingchakaha aro singaha:

"Ia manderang maiko amenga?"

"Sir, anga uija. Indiba uamang nang baksa agangrikna ska. Ia me tra nang na katta mingsako uiatna nanga ine agana. Ua katta Isoloni onga."

"Isoloni?"

"Oe, Sir, ua indaken aganenga,"

"Aro nangchong motgipa katta onga" ine Joan agandapaha. "Na'a tanga dipet ua katta nangna mongsongbatgipa katta ongen. Na'a una gisik on jaoba, da'o, ia salo uko knana nanga.... Indiba ja'mano na'a ia kattana gisik ongen... Oe, ja'mano jeko ia katta uiatgen, uko na'a chusokatgen. Da'o ka sapae na'a rebo. Anga nangko jarikpagen."

"Saitan nangko watatenga" ine Captain aganaha.

Indiba Joan gureni lagamko rimaha. Ua pangnan ai'ao. inmanpilgipa bilchi gurerangko bamatrongachim. Uarangko antangona re'bachina okamon, uarang re'bae, uko gingtingchi jilkinge jarikrongachim.

Da'o Joan Captainni gureni chinggipa gitokko doktopachim aro gure antang gingtingko uni jakrangona jilsiksikengachim.

"Re-babo" ine ua mamatangna aganaha.

Mamatang, gure, Captain uko knachake re-aha. Captain aiao inmane mamungkoba dakna man-jachim.

Indaken uamang sakgittam sara gita bijatchio donggipa dal'a nok te-saona sokangaha.

Uano Captain gureoni ongone sengsogipa sipai saksana lagamko goataha aro uni mikkango donggipa janggeogadoe re-engon, Joan aro uni mamatang uko jarikangaha.


An tangni dal'gipa officeona soko, Captain Joano singaha:

"Angoniko na'a, maiko am'enga?"

Joan uni mikkango sronge chadenge, Isol Rongtalgipa Sakgittamni kusikchi una aganahachim ine janapaha. Ua dal'gipa sipairangni kotokko dile, Englishrangoniko France asongko jokatgen.

Ua joljol jajagija aganaha.

"Indiba pilakna skangan" ine ua agandapaha. "Anga Chinonchi re-angna nanga. Dauphin uano donga ... Na'a, Sir, sipairangko ang baksa watatbo. Uamang angko uchi re-dilangchina. Anga jamano Dauphinko Reimschi rimanggen aro uno uko mukut stikatgen. Una skang anga adita chang Englishrang baksa dakgrike uamangko am'gen."



"Ia ramram kamrangna agre, na'a, minggipinko dakna mangsongama?"

"Dakgenkon" ine Joan aganchakaha. "Indiba da'o anga uibrekuja."

"Nibo, na'a chongipa me'tra" ine captain aganaha.

Aro rangsan Captain de Beudricourt inditana kingking ka'onangbee niaha, maikai Joanni mamatang kenchakbeaha.

Indiba uo kena napgija Joan nitatachim.

"Nibo, me'tra! Anga nangko aro nang baksa re'bagipa mandeko uijasrang" ine captain ka'onangbee aganaha.

Iako nike uni mamatang Joanna kenchakaha.

"Aro na'a. mande, ia me'trani pagipa ongode, angni hukumko manibo. Nangni demechikko nokchi rimangbo aro uko dokbo maikai ua ia jarani kattako gualsranggen. Masiama? Bilsue uko dokbo! Chanchie nibo: me'tra saksa sipairangni pamong onggen! Ua me'tra an'chingni Dauphinko mukut stikatgen! Ua me'tra France a'songko jokatgen!" ine captain mikchepe aganaha.

Ka'onangani gimin uni kuchilrang moachim aro ua uni mikkango donggipa tebilko doktopachim.

"Da'on re-angbo, gisik grigipa me-tra, achak bisa. Nang-ni mikkangko angna pangnaba mesoktainabeaha."

"Anga re-anggen" ine Joan aganchakaha. "Indiba bilsu gitalni a-bachengchibara anga nang-ona re-bataigen. Unon na'a angni kattako knachakgen. Unon na'a dingtang mandesa onngen."

"Re-angbo, na'a jara bisa."

"Angni kosako ka-onangnabe. Anga reginok" ine Joan aganaha. "An-ching kario January jao gronggriktaigen."

Joan gongnoke salam ka'aha aro Captain ka-onangani gimin aganna man'jae Joanni aro uni mamatangni re-angani ja-gamrangko knaaha.

Dikdiksana jriprang ong'ahaon ua kelkiona reangaha. Joan aro uni mamatang sipairangni dongchakani cholgugaona sokangahachim aro Joan ua sakgni nitimgipa sipairang baksa agangrikengachim. Ua dikdiksanasana agangrikenba re-soaha aro sipai sakgni uko salam ka'aha.

JOAN SIPAINI KAM DAKA

Burgundianrang chadrapa

Ua bilsini dingkari Domremyo namen an-sengbatsranggipa ong-achim. Indiba adita bilsirang badeangmano pilakan ua songni aro sepang jolo donggipa songrangni manderang dildil onge ua somoiko gisik ra-achim.

Englishrangna chakgipa Burgundianrang salgipengoni chadrape ua France a songni bakrangkoba chadrapaha.

Joan aro uni nokni manderang ka dongna manjaha. Unon uamangni nokko rue galaha. Song gimikkon rusiaha aro giljanokkoba waal soaha.

Chel'begipa France a songni bijangchipakchi Englishrang songrangkode amengachim. Uamang dal'gipa songjinman Orleansko changduulna manahaode, altuen France a song gimikkon amgopgnok. Indaken pilakan kengoktokengachim, maina da'o France a songo changgipa aro ka donggipa jilgiparang dongjae sipairangba dakgrikna ka sokjaha.

Domremyo

Wachikari bon angchibara Joanni nokni manderang Domremyona antangtangni dongram nokko rikpiltaina re-bapilaha.

Joan antangni nokni manderang baksa bilsi gital abachengaona kingking rakbee kam karimpa-aha. Ua Vaucouleurchi madetang aro mamatang baksa dongna re-angpiltaigen ineba uamangna aganaha. Madetang sabeani gimin uko nirokna aro sanna nangnikenga ine ua agandapaha. Iana agreba una gipin dakna nanggipa kamrangba gnang. Magipa uko singa gnang nitataha, indiba Joan mamungkoba aganchakjaha. Indaken ua salsaoka sinbegipa pringni somoio rechakataha.

Joan Vaucouleurso songdongtaia

Skang gita mamatang aro madetang uko kasae rimchaksoaha aro Joan ru-utgijan Captain de Beaudericourtko grongtaina re-angaha.

Uni skango nikanggipa Captain da'o budèpa ongaha. Uni kni bokachim aro uni mikronrango kenanian gapachim ine masiachim. Beben uo kenani a'sel dongachim.

Englishrang Orleans songjinmako changdu-ulahachim aro inditana kingking uko sinjetachim, maikai ru-utgijan Frenchrang

antantangko uamangni jako onna
nanggenchim.

Captain da'o skang gita Joanni kosako
ka'onangjaha indiba uni kattako knachakna
jehakkuengachim.

"Maikai anga nangni aganani kakket ongbebea
ine uigen?"- ua singaha: "Na'a Saitanni nokkol
aro montol dakgipa ongja ine maikai anga
uigen?"

Joan aganchakaha:

"Sir, anga gun-montol dakgipa ongja. Anga
kurangrangni aganakosa uiata aro ua
kurangrang Isoloni ongaia. Beberabo, Sir, ua
kurangrang Isoloni ongchongmota. Aro iakoba
beberabo: somoi sepangaha. Englishrang
salantian bilakbatroenga. Kasapae angko
bakkaban Dauphinona aro Orleanschi watatbo."

Da'oba Captain mamungkoba dakjaha.

Unon sal sao Joan uni mikkango chadengaha. Uni
mikkang anchi gri gita ong-pila aro uni kuchilrang
moachim maina ua salni pringo Orleans sambao
Frenchrangko bilonge amahachim ine ua
aganaha. Kurangrang iako una uitahachim.

"Na'a da'o angko watatjaode, ua sipairangna
nambatjawa. Ia antini bon-on na'a, namgijagipa
koborko mangen."



Beben Sonibar salo kobor sokbaaha. Una watatgipa lekkako man'on Captain de Beaudrichourtni jakrang moachim aro seatgipa koborko poraion, uni mikkang dimelbataha.

Jekon Joan aganahachim, uan kakket aro bebe ine ma siaha.

Joanko uigipa sipai saksa sambao dongachim aro Captain uo singaha:

"Ua Domremyoni me-tra bachijok?"

Sipai aganchakaha:

"Da'o ua Vaucouleurso songdongenga. Uni dongram ianoni che!ja."

"Knalo pringo anga uko grongna rebaenga ine uiatbo aro kamal saksaba dongpachina ine aganebo."

Salgipino pringo je somoio Captain sokaha, kamal aro Joan una sengsoengachim. Captain fathero singaha:

"Ia me-tra nama bisama ba denggugipa saksa? Ua montol dakgipa ongama.? Maina ua chel'aoonganirangko aro darangba uigijagipa aseirangko uia. Ua Isolonima ba Saitanoni?"

"Captain", ua aganchakaha. "Joan montol dakgipa ongja! Iako anga uichongmota aro Isolonisa onga ine anga beberaa."

"Indide uni kattarangko kakket ine anga
ra chakgen."

Aro Joaṇona anpile agandapaha:

"Tra, knalo re chakatna antangko tarisobo. Anga
gure mangsako aro nangko nirokchina officer
sakgniko aro adita sipairangko watatgen aro anga
chiti kingsako see Dauphinna na'a uko grongna
re angenga ine uiatsogen."

"Nangko mittela" ine Joan aganchakaha.

Chinonchi Songre'ani

Salgipino pringo ua Vaucouloursoni re chakataha.
Ua somoio banga manderang uko nina re baaha.
Pilakan jagipuaha aro mitam mitam jagidotako
manaha, maina Joan sipairangni posakko
ganahachim. Manderang uni krugipa sipairangni
gandingko aro gisim aro kaltapru cholako
niengachim.

Oksambengoni tonual dingdeachim. Uni ro gipa
knirangko rasotahachim.

"Niboda!" ine uamang aganengachim.

Pilakan ua banga a selrango ga akgen ine uko
mikrakataha.

"Naa, re angna nangjawachim! Nangni re gipa
ramarango English aro Burgundian sipairang

bangsranga. Na'a uamangoniko antangko
chelchakna man'jawa."

Indiba Joan ia mikrakatani kattarango
knachakjaha.

"Ramarango angna kenchakani dongja" ine ua
aganaha. "Mamung a:seloba anga ga:akjawa.
Jamanosa anga a:selo ga:aknaba donga."

Beben ua banga mailrang a:song gita re:oba aro
uano bobil sipairang bangbeoba, una mamung
a:selko chagrongjaha.

Gisep gisep ramarango kenchakani dongani
gimin Joan aro un baksa re:gipa sipairang walosa
re:angaha. Gisep gisep suuri onahani gimin re:na
nengbeani ongachim aro gisep gisep okkribegipa
se:elrang randinge uamangko chadrapachim.

Pilnipil uamang mrigipa chibimarango batangna
nangaha aro jeoba uamang re:angachim, nitogipa
songrangko nisiatahachim ine nikna man'aha.

Bon:kamao March jao uamang Chinonona
sokangaha aro baloro kari a:bachengani gimin
uamang adita balwako man'aha. Songjinmao
napmitingo sal dingachim aro songni nitoako
nike Joan aiao inman'aha.

Jeoba chongipa nokrang aro barirang dongachim
aro uarangoni mongsongbatgipara dalgipa nok

killa ongachim. Uko chibima dilsani chisamo rikahachim aro inditan dal'achim maikai Joan beberana manjachim.

Robegipa guare killako pengduulachim aro iachi uchi protchongrang dongachim. Guareni nalsachi bolrang aro boldimrang gnganggipa barirangkoba nikna manachim.

Ua dal'gipa killako nitate Joan aiao inmane aganmituaha:

"Ian Dauphinni dongram!"

Unon rangsan mande jinma uko changduulaha. Manderang uni gimin knaahachim: ua me tra jeni gimin banga katchinike aganahachim sokbajok! Ia me tra France a songko jokatgen!

Chinono donggipa sipairang uamangko dilna Joan rebaaha ine masiaha aro uamang sakprakprakan uko antangtangni dilgipa ongatna namnikachim.

Beben uamangko mikmalatna Joano dingtangmacha bil dongachim. Ua antangan aro gipinrang pilakan iako talatna manjachim. Indiba indakgipa bil uo dongchongmotachim.

Ua sal Robibar sal ongachim. Giljani kontarang dokengachim aro Joan pilakna skangan giljachi rena gisik onaha.

Uni j amano ua nokchi re-angaha. Songni jatchio una chongipa nok tesako tariahachim aro uano ua sal gni sengkuna nangaha.

Nokni kelki gita ua songni killako nikna manachim. Sipairang killani dogacholko nitimengachim aro ua dogachol gita banga manderangni napa aro onkatengako nikna manachim. Ia nikani Joanni gisikko dingataha.

"Basako ua killao napna mangen?" ine ua chanchiachim.

Ua Dauphinni okamatanina sengsoengachim. Indaken sal sao Dauphin uko attamo gronggen ine uiataha.

Joan Dauphinko gronga

Uko gronggen ine uiatahaon Joan aro gipinranga kusi ongaha.

Killao pilak Dauphinko dakchakgiparang aro una dangdike on giparang Joanko nikna sikbee sengsoengachim. Ian game chagipani bisa! Uko maiba dintangmancha kamko kana Isol watataha!

Indiba mitam mitam uko ninasa sikachim aro uamangoni bang an Joano ka-dongjachim.

Dauphinba Joano ka-dongjachim aro uko grongna namnikjaoba, jajrengataniko chel'atnasa uko okamatahachim.

Kadingsmite ua un baksa dongpagiparangna
aganaha:

"Ia me-tra, drae dake angko grongna amenga. Ua
jechakako knachakja... Kratchaja chongmot!"

Iako aganon ua kadingatna agana gita
aganahachim ine chanchiman-pilaha aro un baksa
dongpagiparang apsan dake chanchiaha aro
kadingtokengachim. Indiba jensalo Joan
uamangni mikkango chadengaha, darangba
kadingjaha.

Dauphin antangan jrip dongaha.

JOAN ARO DAUPHIN

Chinonni killao

Joanko killani dal'begipa kuturi damsao rimchaksoaha. Ua killani bak nitobeachim: dal'gipa kelki gegittam gita kisangchipak barirangko aro mikkangchipak chongipa kelki gita chibimako aro songko nikna manachim.

Ua kuturiona napangon manderang gapachim ine Joan nikaha sipairang, ukilrang, bishoprang aro fatherrang. Pilakan nitogipa bararangko ganachim.

Joan indita mingsinggipa aro dal'gipa manderangko nikkujachim! Indiba dogacholoni ua manderangko nie, ua jajagija chadengaha aro Dauphin sawa nisandiachim. Ua Dauphinkosa amengachim.

Dauphinde uko jongkae rona aro jajatna, antangko donnuahachim. Indioba Joan jajaha. Ua niwilwalaha. Unon changrogipa aro rangipa mande saksako nike, ua kasine kasine ree, uni mikkango chadengdikaha.

Joan sipaini ganding chindingkon kruachim: ua gisingipa krudapani cholako ganachim;

kangkareo matbigilko kaachim aro uni kni rasotahachim.

"Rasong gnanggipa Dauphin" ine ua aganaha aro ja samsa jasku dipane ua Dauphinni jakko kudimaha. "Rasong gnanggipa Dauphin, da'o anga nangko grongna manaha."

"Joan" ua aganchakaha. "Na'a, Joan d'Arc! Na'a ua metra onga!"

Ua kadingsmitaha aro Joan chakate uni sambao chadengaha. Dauphin baksa uko tode Joan chonachim. Dauphin changrogipa aro rambegipa ongachim. Uni jak ja'arang rakjachim aro uni kusik ontisa kuanga gita dakachim.

Mikgronrang delbuachim maikai ua tusidimue salko reatrongachim ine manderang chanchina nangachim.

Indiba ia attamo ua gisik nange ua me-trako nitatengachim aro Joan ka'sae uko nitatskaengachim.

Joan una kasachongmotachim aro Dauphin da'o rajani ganding chindingko krugipa ong'ja indiba Raja ongchongmotachim ine chanchiaha.

Joanko okamatanina ua da'o kusi ong-beaha aro un baksa agangrikna sikaha. Aro pilak ua kuturio dongpagiparangba Joan baksa agangrikna sikachim. Indiba Dauphin uamangko ongkatangchina ge-etaha.

"Na simang da'o re'angbo" ine ua antang bilgrigipa aro gamgijagipa kurangchi aganaha. "Re'angtokbo! Ian Joan, ua agansogimin metra onga! Anga un baksa agangrikna nanga. Ua na simang baksa agangrikna re'baja. Re'angtokbo! Aro na'a, Joan, ianona re'babo. Anching iano kelki sambao asonggnok maina ianoni barirangko nikwata."

Pilakan jrip dongaha aro Dauphin aro Joan kelkiona re'angon, ua kuturio uamangko nirike, ua sakgnian ongronggijagipa jorasa ongachim ine pilakan chanchiaha.

Joan Dauphin baksa agangrika

Indiba Joan jajajachim aro Dauphin sambao asonge, Domremyo antangni nokni babilisio pagipa baksa ba adatangrang baksa aganronga gita, ua Dauphinna aganaha.

Dauphinba maikoba una aganaha indioba uni aganarangna ua knatimna gisik on'jaha.

Maina Dauphinnisa uigimin a'selangko Joan una parapena a'bachengaha aro jeko ua antangni gimin gipinrangna aganrongjachim, chongmotan uni knagimin kurangrang, nikgipa rongtalgiparang, uamangni uiatanirangko ua aganaha.

Uamang ru'utana kingking agangrikaha aro
agangrika matchotoa, uni mikkangko nie, pilakan
Dauphin ku'si ongachim ine ma siaha.

Unon Dauphin Joanna killao biapko tarichina,
uko mandera'ako man'na kragipa gita
sokachakchina aro una dangdike on'na saksako
tik ka'china ge'etaha.

Iana Joan ku'si ongbeaha.

Sal namkuengachim aro sal gipino ua barirango
ree rona, sal napna skangan gureo gakate roaha.
Da'o Dauphin una chakachim ine ua nikaha.
Indiba kam ka'na a'bachengna ua Dauphinko
namnikatahachimma?

Frenchrang da'o maikoba bakbakan dakna
nangachim. Dauphinna dangdike on'giparangko
nie, uamangoni sawa uko dakchakna mangen
Joan chanchiengachim.

Alensonni Duke

Sal gipino mande saksa killaona rebaaha, jean
Joanni nambatsranggipa ripeng onggen. Pilak
nengnikanirango Joan uona katnapna mangen.

Ua Alensonni duke ongachim, Dauphinni
chatchi dambepitti ong'oba ua changgipa
sipairangni dilgipa saksa ongachim.

Uni dongram Chinoni cheljachim aro ua Joan killao dongachim ine knaenba, bakbakan uko grongna aro uni gimin sandina re'baaha.

Joan baksa agangrikmano, duke Joanko dalnike, uo ka dongaha.

Sal gipino Joan giljanoko Missao dongpa'e Dauphinni sambao asongaha.

Duke da'oba uko nie rasong chae dal'nikaha aro Missa Boli matchotoa, ua un baksa gureo gakate rochina una aganaha. Da'oba uko nike skangna bate uko dal'nikbataha. Maina indaken gureo gakate rona gipin me'chik saksakoba ua nikkujachim. Ja mano seluko gitcingatna dakon, Joan changbegipa ongachim ine Duke nikaha.

Unon ua ru'ute Joan baksa agangrikaha aro uni kattako knatimaha. Joan ua nitogipa killako wate Orleanschi re'na sikbeachim ine ua dukena aganaha, maina Orleansko changduulachim aro bakbakan uko jokatna nangachim. Iako matchotenba, Dauphin champengani gri salgrochi mukut stikakao man'na re'angna mangan.

"Aro uni jamano mai onngen?" ine Duke singaha.

"Tako anga uija" ine Joan aganchakaha. Aro aganmitudapaha: "Anga mata bu'ako mangan

indiba bilonge angko matatjawa ... Orelansko jokatoa, anga Reimschi re'anggan. Aro jamano ... jamano mai onngen ... uko anga uikuja."

Joan Tourschi Re-a

Adita salrangni jamano uko dal'gipa songjinma Tourschi rimangaha. Uno mande jinma uko nina re'batokaha. Unon una gipokgipa gandapaniko on'aha. Joan ku'si ong'beaha. Indiba ua jrimani gimin Joan uko gane altue re'na man'jachim.

Dauphinba un baksa Tourschi re'angaha, indiba sipairangko nirokna nangani gimin Joan un baksa bangen rona man'jaha. Ua sipairangko namen uina sikachim aro dakgriknasion uamang maiko dakna nangachim, uko uamangna talataha.

Uni aganon uni kurang aro kattarang rongtalachim. Pilakan knana aro ma'sina man'achim aro pilakan muni nangatako man'e knatimengachim.

"Na'simangoni mitam mitam sinaba donga ine ua agandapaha. Uni gimin ang baksa dakgrikna re'angna skangan papkurachakbo aro Rongtalgipa Kumunionko rabo."

Iarangko pilakan gisik nange knatimaha.

Salantian ua uamangna aganman'aha aro ru'utgijan sipairang uni nambatsranggipa

ripengrang ong'baaha. Ua mamungkoba donnujachim aro ua mandeskarangko matatna aro so'otna namnikjachim ine uiataha.

"Me'chik ong'ani giminsa anga indaken chanchia" ine ua inaha aro dakgrikani a'selko talatna ua agandapaha:

"Anga Bedfordni Duke, English sipairangni commandero dakgrikna dontongna molmolaha. Anga una indaken seaha: ia a'songni nangni ra'sekgimin songrangni chabirangko angna on'atbo, anga ua Franceni Me'tra ong'a aro salgini Raja nangko am'na angko watatenga ine rongtale aganaha. Iakoba anga una aganataha: Ia a'songo na'a a'selo ga'aknasia. Iani gimin bakbakan a'songtangchi re'angpilbo. Indiba ua ia pilak aganatanirangna aganchakkuja."

Unon ua Orleansni gimin agane, uko changduulgiparangko arikatna nangaha ine agandapaha.

Ua songni Frenchrang cha'ani gri'onga aro mitam ka'sokjajok. Indiba anga na'simangko uchi re'dilanggen. Uamangna cha'ani aro silchidarerangko on'gen. Sipai kotok uchi're'gen aro bobilrangko amna uamangko ka'dongatgen. An'ching songko changduulgipa Englishrang aro Burgundianrang baksa dakgrike, uamangko arikatgen aro amsranggen. Ua songo English aro

Burgundian sipai saksaba dongjawaha. Iako anga uia maina anga na simangni dilgipa onga aro Isol angko dila. An ching amchong motgen. Ian chanchichipani ba gualani ongja. Iako anga uisoa. An ching amchong motgen.

Joan Orleanschi re'a

Iako ua uiatahani gimin, Joanni kattarang Dauphinkoba jotwingwingaha aro je somoio Joan rasong chae sipairangni kotok Toursoni rechakatangaha, Dauphin uko nirikengachim.

Jaon gureo gakate re dilangaha. Alensonni Duke gipin sipairangni dolko dilachim, indiba uamang rechakatna antangtangko tarisokujachim.

Joan aro uni dol adita salrang songreaha aro bonkamao April jani 28-gipa tarikni attamo, uamang Orleansni guarerangko nikaha. Indiba mikka waani gimin uarangko tale nikna manjachim. Tarakgipa balwa balachim aro namen sinbeachim.

Indaken dikdixsanade balroro kari gimaa gita ongpilahachim.

Songjinmaona sokangna uamang chibima dilsako batna nangachim. Joan chisamo tamburangko pingna ge'etaha. Unikoa pilakkon name nirok sandienba antangde chongipa aro mikka seldapgipa tambuo tusiaha.

Pringwalni chakate wilwilao donggipa a songko niaha aro Orleans mailsana bate chelengkuenga ine ma'sie duk man'aha. Chibima dal'achim aro tarakgipa balwa baksa chipakkore satengachim. Chadrapna gitaba balwa champenga gita ongengachim.

Rangsan ua sakgipinni kupatianiko man'na skaha aro Alensonni duke unbaksa dongna nangachim ine chanchiaha.

Unon chibimao mande saksani chongipa ring bolsao chadenge an tangona chobaengako nikataha.

Ua mande Orleanso donggipa sipairangni dal'gipa pamong, General Dunois onga ine chanchie, Joan chinko on'atskaaha.

"Salam!" ine Joan chrikaha. General Dunois salam!

"Oe, anga General Dunois aro na'a re'bahani gimin anga ku'si ong'bea."

Ru'utgijan ring chisamona chobaaha aro general ongonba'aha. Ua budepakujachim aro uko nike Joan Alensonni Dukeko gisik ra'aha.

Joan uina sikbee singoa, general donggipa biapan nambatsranggipa onga ine aganaha, maina gipin biaprango bobil sipairang bang'beachim aro

simsakbee nitimengachim. Joanni chongipa dol uamangko warachakna manjawachim.

Iani gimin Joan Alensonni dukena aro uni kotokna sengsona nangachim.

Iana agre ua tarakgipa balwaan chadrapaniko champengachim. Indiba Joan chadrapna sikbee pilak champenganirangko mamung gitaba nikja. Ua:

"Isolni bimungo chrikaha. Iarangna an'ching gisik on'na nanga. Anga Gitelni ge'etako man'esa ianona re-baaha. Isolni katta aro kupattiani nambata. Anga da'o chadrapna ska. Nangni agangipa champenganirang angna mamungba ongja."

Aro uni agapittion pilakan mingsana aiao inmanaha. Indakmiting somoi chachaon balwa Orleans chipakoreni baljaha aro uamang altue chibimako batna man'achim.

Dunois iako niko jagokman pilaha maina ian aiao inmanani mingsa onga ine ua chanchiaha aro sakgipinrangba apsan dake chanchitokaha.

Indiba Dunois Orelansko jokatna unsalo bobilrangko chandrapna nangachim ine namnikpajachim.

Unon ua Joan baksa gureo gakate chisam gita re'e, una bobilrangni donggipa dintang dintang

biaprangko mesokaha aro da'o balwa skang gita balangjani gimin, ua an'tangni dolni sipairangko watange, un walo Orleanso napangchina uo mol'molaha.

"Orleansni French sipairang aro pilak songni manderang nangko nina ska aro da'o na'a altusrange chibimako batangna man'gnok. Uamang nenga aro ka dongani gri ong'tokenga. Na'a, uamangko ka dongatna man'a. Ua sipairangba, nangni kotokni manderang gita, nangni sipairang onga."

Joanni mikronrang ching'aha. Ua pangnan indakgipa salo Orleanso napangna mangsongachim aro da'o uko champengna nangjachim.

"Oe, anga da'o napangna ska. Aro Dauphin da'o ang baksa dongna nangachim. Ian angni ska."

"Dauphin da'o bano donga?"

"Angni re'chakaton ua Tourso dongachim. Ru'utgijan ua iano ang baksa donggen. General Dunois! sipairangni janggi tangani ansaogipa onga!"

Unon Joan ka dingna a'bachengaha aro Dunois uko jagoke nitate, ua dambepitichim aro kadingmitingo nitoachim ine chanchiaha.

ODHAI 5

JOAN RASONG CHAE AMA

Joan Orleanso napa

Orleansni sipairang aro manderang Joanko rimchaksona sengsoengachim aro je somoio ua chonggipa aro moenggipa ringoni ongonbaaha, pilakan inwatna a'bachengaha.

Ua chasongni mande saksa seaha gita: Unsalo manderang Isol uamangona rebaaha gita chacha ka'srokaha.

Uamang banga dukko cakahachim aro ka dongani gri ongtokengachim. Dao songjinmako changduulgipa bobilrangko arikatgen. Pilakan Joanko dangtapna amengachim.

Uona gipokgipa gure mangsako mobaaha aro uo gakate ua antang gipokgipa krudapani cholako gane, songjinmako re'oroaha.

General Dunois, adita officerrang aro banga sipairang un baksa reangpaaha aro jinmarang inwatna dontongjachim.

Joan gisik nange agananirangko knatimaha aro gisep gisep uni mikronrang mikchi ongengachim. Manderang iako nikgenchimoba ua kratchajachim.

Una tarisogimin noko napon andalachim aro
unoba jinma nok sambao jamanchakrike, gambee
gitrangko ringengachim.

Ua walo ua tusidapaha aro uni dakronga gita
pringwalni chakate, ua Missao dongpana
reangaha.

Unikoa Dunois baksa agangrike dakgni
kamrangni gimin chanchirimaha.

Dunoisni chanchia aro namnika gita chadrapani
somo i ongkujachim. Iako Joan masiaha aro
Englishrangni katangako nikna sikbee, daoba
mandeko watate, dakgrikaniko dongtongatchina
uamango molmoltaiaha.

Indiba uamang chrike uko kragija saiaha:

"Na a kangalgipa matchu nirikgipa bi sa! Nangko
rimode, chinga nangko wa'al so'gen."

Jisuni salgichi gakatangani sal sepangaha aro uni
ja manosa dakgrikchongmotani a'bachengaha.

Orleansko jokata

Alensonni Duke aro uni kotok sokbaahachim aro
adita salrangna manderang dakgrikaha.

Je biapo bilonge dakgrikachim, uano Joan
dongrongachim aro uano aganronga gita,
ruutgijan mata-bu'ako man'aha. Bra gesa uni
danilko supongeaha aro gitokni ningo uko

mataha. Unon bra uni be-enko suprotaha; indaken saknaako man'ani gimin uko dakgrikani a'baoniko ra'angaha.

Indiba adita kontarangni ja'mano ua an'tang sipairangona re'hapilaha, maina uamang sinjetako man'achim. Indakoba uamang watgaljachim aro sal gipino, May jani 8-gipa tariko, dakgrikani matchotaha.

Joan aro uni sipairang amsrangahachim. Englishrang indita bilsirangna Frenchrang baksa dakgrike, uamangko amrongahachim. Indiba da'o uamang an'tangtangan amatako man'aha. Da'o uamang nengbeachim aro ka donga gri onge katbildangaha.

Frenchrang katchabeaha: pilak giljanokrangni kontarangko dokaha aro wa'alrangkoba watataha. Cathedral giljanoko manderang gapsrangaha aro uamang Isolko mittele gambee ringaha maikai chelaoniba mittelani gitko knana man'achim.

Joanko rasong chaata

Pilakan Joanna rasongko on tokengachim. Uko nike manderang uko dongduulachim. Uni gimin ua neng'beani gimin saksan dongna ske, an'tangko donnuaha. Jekon Dauphinni ge'eta gita una dangdike on'na donahachim, uni neng'aniko ma'sie:

"Nangni kuturio nengtakbo" ine una aganaha.
"Anga dogachol sambao donge darangkoba napna
onjawa."

"Nangko mittela" ine Joan aganchakaha.
"Dikdiksana tusienba anga Isolo bigen. Dal gipa
cheani mandeko ka'srokata."

Indiba ja mano ua banga dukkoba rabaa.

Sal dingbeachim aro attamo dingbatachim.
Bedfordni Duke, English sipairangni pamong,
an'tangni janggi tanganio mamung saloba
indakpile gisiko jrimaniko mankujachim. Gisep
gisep ua matchu nirikgipa me'trako ua gambee
sao on'achim maina ua uni sipairangni rasongko
gimaatahachim.

Ja mano ua ro'begipa chitiko an'tang rajana see:
Joan Soitanni sninggipa aro nokkol, namgijagipa
muni-pigipa montol ongchongmotachim ine
uiataha.

Uko rimna man ode ua bilongen ajak sokgen aro
iako chanchie uni mikgronrang chingchaaha.
A sel minggnini gimin ua ajak sokna skachim:
pilakna skang bilsil kolgrik onggijagipa me'tra uko,
dal gipa sipaiko amahachim; aro iana agreba ua
me'tra dakgrikani gimin mamungkoba uijachim.

Salantian ajak sokna skani uo aro uni kotokni
sipairangoba bariroroangachim.

Indiba Joan antang katongo uamangoni darangkoba mitchijachim aro ramarango English sipairangni manggisirangko nike, ua duk manachim.

Uni jringipa tonual pangnan uni kangkareo dingdeachim; indiba ua uko jakkaljachim. Jamano ua aganaha:

"Bobilrangko chadrapon, darangkoba so'otjana, anga nisanko ra'a."

Uni nisan apalgipa aro gipokgipa bara ongachim. Uo sagrerangni noxsako aro Jisu aro Mariani bimungrangko kildingchi sikahachim.

Englishrangko arikatmano, sal sao Joan nengtakaha. Unon pringwalni ua Tourschi re'chakataha. Dauphin uano una sengsoengachim. Samtangtangchi donge Dunois aro Alenson un baksa gureo gakate re'angpaaha.

Sal namachim indiba jeoba dakgrikani somoio a'songko nisiatsrangahachim ine uamang nikna manachim. Jeoba wa'al so'atgimin songrang; jeoba nisiatgimin mi-misirangko nikangaha. Indiba a'a gamgiparang kam kataina abachengengachim, dokarang mikoachim aro sarurangba ku'si onge mikochepchepengachim.

Pilak manderangan, man'e cha'giparang aro kangalrang, budeparang aro damberang, Joanko

inchroe tomdakachim aro ua Tourso napon pilakan an'senge git ringaha aro kontarangko dokaha.

Joan Dauphinko grongtaia

Uko rimchaksona Dauphin songni dogacholo sengoengachim aro uamang sakgnian damsan uni dongram killaona re'angaha.

Joanna rasong on'ako nike, Dauphinba ka'tong moaha aro uko skang, an'tangni mikkango killao napangchina on'aha.

Indiba ua Toursko namnikjachim. Tours dal'gipa song ong'ani gimin uano gam'chipchipe jikjakanirangna ua suk ongja aro dongna kusi ongnikja.

Uni gimin ua walo ua Joanko gipinchina watataha.

"Knalo, Joan, pringwalni an'ching Locheschi re'anggan" ine ua aganaha. "Na'a uno donggipa angni killako nikkuja. Ua nitoa aro an'ching uni barirango asonge agangrikgen aro anga nangni aiao inmanani kattarangko knagen. Dao angni sko sabea aro sal dingani gimin aro manderang jikjakani gimin anga tusina ska. Knalo anga an'sengbatgen indiba da'o anga nengtakna nanggen."

Joan una Orleanso amani gimin aro mongsongde Dauphinni Reimschi bakbakan re'angna nangani gimin aganna sikbeachim. Indiba aganna chol ong'jaha. An'tangna tarisogimin kuturiona doangmittingo, ua, Dauphin, pringo chakate, an'tangni ku'rachakaniko chu'sokatgenma? ine ua chanchijoljolengachim.

Sal gipino pringwalni chakkolrang Raja una sengsoenga ine uko okamna re'bahaon, ua aiao inmanaha.

Dauphin Lochesni killako namnikbatachim. Wilwilao biaprang nitobeachim aro uni barirangba France a'songo nambatachim. Dauphin uano asongna namnikachim aro uano dal'gipa bol pangsani salakimo aro jokdoenggipa pokrini chi sambao, pring gipinoba ua aro Joan agangrikna asongaha.

"Iano, angni sambao asongbo" ine Dauphin Joanna aganaha, "aro Orleanso mai ong'aha, iako angna aganbo."

Uni gisik nangbee knatimengon Joan pilakkon una tale agane on'aha.

"Joan, na'a rasong chabee amaha. Da'o ua namnikjagipa Englishrang an'chingoni katanga."

Iako aganon ua an'tangni gamchatbegipa gandapani cholao sikkiga bibalrangko doktepe,

ka'dinggagakaha aro indaken agandapaha:

"Iako knana anga ku'si onga."

"Oe, rasong gnanggipa Dauphin. Da'o an'ching Parisona kingking uamangko rikangna nangachim. Indiba angni nikao pilakna skang na'a, Reimso mukut stikna nangachim."

"Ka'sara Joan, na'a pangnan iana sintea. Indiba maina bakbak mukut stikna na'anga?"

"O rasong gnanggipa Dauphin, bakbakan nangko mukut stikna nangchongmota. Na'a da'o re'chakatbo. Angni ku'rangrang angna iako aganaha. Indide maina na'a sengkugen?"

"Ia biapo an'senga; anga gipinchina re'angna sikja. Iano sal dinga aro sal angko teng'sudapon anga suk onga. Iana agre anga neng'a aro na'aba-anga chanchia. An'ching neng'takna nangchongmota."

Indiba Joan heng'takna sikjachim aro dongdikgija Dunois, Alenson aro sipairang baksa kumonggrike, Reimschi re'gipa rama sambao donggipa songrangko chadrapna aro ra'sekna tik ka'aha.

Uamang song damsaoni song damsaona re'ange, uarango napdraaha. Darangba Joanko warachakna man'jachim aro June ja bon'nasion ua Dauphinko salgrochi re'chakatna draataha.

Dauphin Reimschi re'anga

Reimschi re'angon manderang katchae Dauphinko nina aro grongna re'batokaha Mitchia man'gipa Englishrang katangahachim aro ru'utgijan bonkamao ua France asongni raja onngen. Iako niksoe manderang kasrokachim aro aditani ja'mano Dauphinba ka'srokaha.

Angko mandera'a man'na kragipa Raja Charles VII ine mingode, an'senggen! ine ua chanchiaha.

"Aro haida Reimsni Cathedralo ripinggimin tochi nongako man'e-iakoba ua chanchiachim -rajani bilna agre gisik nangako aro gong'ako man'gen!"

Ua toko sonani bottle tesao ru'uta bilsirangna rakiahachim aro mamung saloba uko gipinchina watatjachim.

Raja mukut stikako man'on, sonani chongipa pinchi ua toni tingtot sako uni mikkingo nonggen aro ua banga Rongtalgipa Gisikni kasae on'anirangko man'gen.

Ia chanchiani Dauphinko an'saoatachim. Indiba indake onngenma? ine ua chanchiengachim.

Jeba ong'china, ia chanchiani nambeachim aro uni skoo sonani mukutko stikgen! Iako chanchion uni ka'tong rongchu subatachim.

Indaken kusi ong'bee, ua, 1429 bilsio, July jani 16-gipa tariko, Reimsona sokangaha.

ODHAI 6

DAUPHIN RAJANI MUKUTKO STIKA

Dauphin Cathedral giljachi re'a

Sal gipino Dauphinko rajani mukutko stikatna mangsonge pilakkon name tarisona manjaha. Indiba kraa gitasan tarisoahachim. Kam bangkuengani gimin wal gimikon cathedralo turirangni gamako knana manaha. Indaken pringo pilak nangarangko tariahachim ine nikaha.

Sal dingbeachim. Aramrang grigipa salgioni sal giljanokni nitogipa kelkirangko tengsuatachim. Uarangoni nabagipa rongrang giljanokko aro kitgimin asongchakanirangko nitoatachim. Wilwilao nisanrangko dingdeachim aro je somoio Dauphin giljachi rena ongakataha song gimiko kontarangko dokaha.

Jensalo ua giljachi sokangaha aro jangkirangko doangna a'bachengaha, gamaniko komiataha aro ua ka'sne ka'sne salaramni kuligimin dogarang gita Cathedralo napangaha.

Dauphinko mukut stika

Reimsni Archbishop aro banga gipin bishoprang, nitogipa bararangko gane uano dongachim. Uamangna agre banga rasong gnanggipa manderang, officerrang aro mechikrangba dongpaachim.

Uamangni ganding chinding chingachim aro Dauphin uamangni gisepo chadengachim. Bolchagipa onгани gimin uni gangimin rajani jringipa posakrang nitoachim. Uni dimela ongronggipa mikgronrang da'o chingachim maikai ua chongmotgipa raja gita nikachim.

Uni sambao Joanba re'angpaengachim. Ua antangni gipokgipa sipaini posakko aro uni kosako sona gita chinggipa krudapani cholako ganachim. Ua jako antang nisanko uko chuate ra'achim aro mikkango agansokgijagipa ku'si ong'ako mesokachim. Manderang pangnan iako gisik rarongaha. Uni janggi tanganio ia sal nambatsranggipa ong'aha.

Pilakchin begul sikani gamachim aro giljanokningo gambee organ salengachim.

Uano dongpagiparangoni saksa chiti kingsako indake seaha: Joan nisanko dedoe pangnan rajani sambao chadengronga aro pilakan uko aro rajako nike katchabea.

Pilakan katchabeaha mongsongbate je somoio Dauphin tochi nongako man'e rajani mukutko stikaha. Unon pilakna skangan Joan mandera'ako aro bamako mesokaha. Saoba seaha: Joan rajani mikkango ja'sku dipane uni ja'skuko gipakaha. Iako dakengon mikchirang uni peerango ga'akengachim.

"Ka'sagipa Raja" ua aganaha, "da'o an'ching Isolni namnikako chusokataha, maina Isol angko, nang'ko ianona mukut stikchina dilbana nangachim ine tik ka'aha. Da'o na'a chingni raja ong'aha aro Franceba nang'nin ong'a."

Iako knae bang'an ka'tong moaha aro grapaha.

Indiba maina uamang grapaha? Joan an'tangni miksonganiko chusokatahachim. Ua Orleansko naljokatahachim; Dauphinko mukut stikna dakchakahachim aro pilakan ka'saako aro mandera'ako man'ahachim chanchina man'a: uamang uijaoba ong'gnirangko niksoachim. Re'bagnigipa salrang ua sal gita ong'java.

Burgundyni Duke

Ua walo Joan ru'ute Isolo bie dongaha maina sal gipino ua Reimsoni Parischi re'angna nangachim. Uano songni mongsongbatgipa biapo Englishrang dongkuengachim Rajaba un baksa re'angpana nangachim.

Nangarangko tariahaon pilakan
re-chakatnasiengachim. Indakmiting somoio:

"Anga re'angjawa" ine raja Joanna uiataha. "A'sel
ian: Burgundyni Duke, adita manderangko
watate, dakgrikaniko dongtongchina
molmolataha."

Sal gni mamungkoba tik kagija batangman'aha.

Anti gnini ja'mano kumonggrikaniko soi ka'aha.
Indiba ua somoio raja Parischi reangna
re'chakatahachim. Joan ua kumonggrikanio
ka'dongjachim aro rajana aganaha:

"Rasong gnanggipa Raja, na'a Burgundyni Dukeo
pangchakama?"

"Pangchakchongmota. Ua French mande onga
aro angni ripeng ong'na ska."

"Nangni ripeng? Joan ka'dingaha!"

"Oe, angni ripeng: Da'o na'a ang' baksa
agangriknabe! Anga raja onga ine gisik ra'bo!"

Joanna agre adita gipinrang ua kumonggrikanio
ka'dongjachim. Iani gimin Joan Reimsni
manderangna chitiko see an'tangni chanchiako
uiataha.

"Angni ka'sara namgipa ripengrang" ine ua seaha;
"anga ia kumonggrikaniko namnikja aro anga ua
gita dakjanaba donga. Uko anga rajani rasongko
gimaatjanasa ra'chakgen."

Sal namen dingbeachim aro Joan gisik suk ong'jaengachim.

Ua somoio ua an'tangni pagipako grongtaiaha. Ua uni rasong chaatako nina Reimschi re'baahachim aro Domremyni nokni aro a'bani gimin aganon, Joan an'tangni songna simbraaha. Gisep gisep ua uchi re'angpilna simbraahachim indiba bang'bea dakna nanggni kamrang dongani gimin ua re'angna man'jawa.

Reimsni Archbishop

Joan baksa sakgipin mande songre'angpaaha. Uan Reimsni Archbishop ong'achim. Ua changroa, nitoa aro bewal rinok rinok dakgipa mande ong'achim. Indiba Joan uko namnikjachim aro uo ka'dongna man'jachim. Uamang skangba gronggrikahachim aro changanti gronggrikon Joan uko an'tang bobil gita chanchirongaha.

Uamang songre'angon Archbishop an'tangni una ka'saaniko mesoke uko an'tango ka'dongatna jotton ka'aha. Ua Joanni knagimin kurangrangni gimin knana sike sing'oba Joan aganchakjaha.

"Joan, na'a, badia biapo sina ka'dongenga?" ine Archbishop sing'aha.

"Isolni namnika gita ong'china. Anga nang' gita biapko aro kontako uija" ine Joan aganaha.

Ku'rangrang ua salrango ua ru'ute a'gilsako dongjawa ine una aganahachim. Indiba iako ua Archbishopna uiatjaha.

Ru'ute ua tangjawa ine uie, Joan bakbakan Parischi sokangna sikachim.

Joan Parischi Soka

Bonkamao ua a'songni skotonggipa songjinmani napani dogachol gesako chongmotan Rongtalgipa Denisni dogacholko nikaha. Ua dogacholko Rt. Denisni dogachol ine mingachim, maina uni mikkango Rt. Denisni giljanok gnangchim.

Ua giljanok da'oba dongkuenga aro nitobea. Ua somoio aro da'oba France a'songni rajarangko uano gopaha.

Joan ru'ute uo dongrike Isolo bina namnikaha. Unon Alenson baksa songjinmako reduule biaprangko nina re'angaha.

Salantion songjinmao donggipa Englishrangko dakchakna aro ka'dongatna, Burgundian sipairang sokbaachim aro uamangni soi ka'gimin kumonggrikanini namgni dongjachim. Uamang Rt. Deniso donggipa rajanaba gisik on'jachim.

Iani gimin gisep gisep Joan aro gipinrangba mongsongbate Alenson ka'dongani gri ong'bataha.

Uamangni ka'donggijani bariaha jensalo raja dakgrikaniko dontongna sikaha ine uiataha. Bang'a Englishrangko so'otahachim; iana agreba dakgrikna aro sipairangko alduna uo chu'onga gita tangkarang dongjachim. Frenchrang songjinmako changduulna nangjawa. Alenson biaptangona re'angpilchina indiba Joan Raja baksa dongkuchina.

Jensalo Joan ia koborko man'aha ua grapbeaha aro Alensonba kratchagija grapaha.

Raja iako tik ka'enba, bakbakan Rt. Denisoni rechakatna sikachim aro Joanba uo dongkuna namnikjachim. Ua biapo ua ka'donggijaniko aro dukkosa man'ahachim.

Indakoba ua Rt. Denisni giljanokko namnikachim. Walo re'chakatna salsa skang ua srik srik giljanoko nape, Metra Mariani bimangni mikkango chadenge, an'tangni gipokgipa krudapani cholako oke, uko Metra Mariani ja'arango donangaha. Ua pangnan ua cholako krue rasong chaachim. Unon ja'sku dipane ua ru'ute uko nisingchakaha aro re'na skang uko dangtapeaha. Ian uko salam ka'chota gita ong'achim.

Uni indake dakako knae Raja ka'onangbeaha.

"Na'a iako dakna nangjachim" ine ua Joanna aganaha. Ru'utgijan na'a uko nangkunaba donga. Nang'ni dakgrikani salrang badeangkuja.

"Uarang iano, Parisni mikkango badeangmanaha" ine Joan aganchakaha. "Mandera'na kragipa Gitel anga nang'na songjinmako man'na amachim. Da'o dakgrikani ru'utgen."

"Ong'ja! Joan. Indaken nambata. Dikdiksana a'song tomtomaniko nanga. Dakgrikna bang'a tangkarangko nanga."

"Tom'tomani!" ine ka'dinge Joan aganaha. "Tom'tomani bao? Englishrang iano dongkuenga aro salantian uamang bilakbatrooenga, maina nang'ni ripeng Burgundyni duke uamangna chaka."

"Indakede ong'ja, Joan. Obostarang namkalenga. Da'o dakgrikani aro so'otgrikani gimin na'a agangrikna nangjajok. Hai katchana aro pilakkon gualsrangna! Na'a ang' baksa dongani gimin anga kusi onga. Na'a angna aro a'songna namen dakaha."

Kurangrang dukko uiatsoa

Wachikari aro sinkarichibara Joan namnikjaoba raja, jeko an'tangni gitel dakahachim, uko drae jarikna nangaha.

Indiba ua somoioba ua dikdiksana dakgrikna man'aha; maina Burgundianrang kumonggrikaniko rakijajok, indaken Frenchrang dakgriktaina a'bachengna nangaha aro dakgrikaniko agalmak kari a'bachengaona kingking Joan gisik, ka'tong aro bilgimikchi dakgrikaha.

Jena kingking ua mikrakatani ku'rangrangko man'ahachim, ua bilonge aro katchae dakgrikaha.

Indiba changsao, pringo ka'sinbegipa March jao, ku'rangrang uko mikrakattaiaha.

A'bachengode ua ku'rangrang kupatianiko on'e uko ka'dongatahachim. Indiba ja'mano dukni giminsa uarang aganskaaha. Uni dakgrikani salrang bon'jok ine ku'rangrang aganaha. Ru'utgijan bobilrang uko rimgen aro patoko chipgen. Ja gnini ja'manosa indaken ong'gen.

Ku'rangrang angna aganaha: "angko rimgen indiba iana anga ken'na nangja, jagokna nangjawa. Iaranko nama ine chanchina nanga, maina Isol angko dakchakgen" ine ua aganaha.

Salantian uarang iako aganengachim aro anga mol'mole bi'aha:

"O Isol, angko rimon, bakbakan angko sina on'bo, jedakode anga ru'ute patoko saknae dongjawa."

Pilnipil ua an'tangko basako rimgen ine sing'oba,
ku'rangrang iako parakatjaha.

"Anga angko rimani somoiko uigenchimode, anga
dakgrikna re-angjawachim."

Indiba ua somoi ru'utgijan sokbaaha. 1430 bilsio,
May jani 23-gipa tariko, attamchibara bobilrang
Joanko rimaha.

JOANKO AMA ARO RIMA

Joanni sipairang katanga

Compiegne minggipa songjinma Parisni
salgrochipako donga aro ua Reimsoni namen
chel'ja. Ua biapo Joanko rimaha.

Uni sipairang bobilrangko warachakna uchi
re'angahachim aro rang'san uamangna bate
bobilrang bang'batachim ine nike, uamang
kenan gape katangaha.

Joan uamangko chimongtaina man'jaha aro
pilakan bilding bildang ong'e, uamangni
katnappgipa songni sale watna man'gipa jalangko
saldoaha. Joan a'palo dongrikaha. English aro
Burgundian sipairang sokbaaha. Bang'bata
Burgundian ong'achim aro jemang Joanko
rimmitingo dongpaachim, ua ka'soke
warachakaha ine aganaha.

Ramram me'chikrang indaken warachakna bil
dong'ja. Ua an'tangni kotokni ka'sokbatgipa
dilgipa ong'achim. Ua mamung saloba
indakgipa bilchi dakgrikujachim aro bobilrang
an'tangko uamangni jako on china uko ge'eton,
ua uamangna ka'dingstekaha.

Attamo dok bajimango uko Burgundian pamongrangona rimangaha. Unon ua nenggope aro bildikbildak ong'e, Dukeko mikkangchongchong niengachim. Una ua bang'a changna chitirangko Seahachim.

Ua somoio uamang sakgnian maiko aganaha, iako an'ching uija. Indiba ua biapo dongenggipa mande saks, ja'mano indaken aganaha:

"Duke Joanna adita kattarangko aganaha, indiba uarangko anga name gisik raja."

Ua uarangko donnuna mangsongahakon maina ua gronggrikanio Joan Dukeko kratchaatahakon.

Joanko patoko dona

Pilakna skangan Joanko sepango donggipa killao rakiaha. Indiba ru'utgijan uko salgrochipak rimange gipin killao doneskaaha. Uano ua ja dokmang dongaha. Uko pangnan ka'sae dakaha. Iani gimin ua ku'si ong'na nangachim. Indiba ua an'tang sipairang baksa dongna sikbee, duk man'aha.

Ua killani nokgiparang bitchuma saks aro uni nogipa sakgni ong'achim. Nokgiparangni bilsirang Joanni bilsirangna bate bang'batachim. Uamang Joanko rasong donggijagipa bi'sa ine chanachim, jeko uamang nirokna aro chelchakna nangachim. Uamang una nama cha'aniko on'aha

aro nitogipa kuturi damsaona uko rimangaha. Unon bakbakan ganani gimin, uamang aiao inmanachim. Indiba Joan an'tangni dakgrikiparangni posakko okna jechakaha.

"Na'simang ka'sachake angni posakko sugalna skode, anga na'simangko mittelgen" ine ua aganaha. "Indiba ia barako ganesa anga ia kuturioni ong'katgen. Da'oba anga angni kotokni dilgipa ong'a aro angni sipairang ang me'chikrangni ba'rako ganaha ine nikode, angko jarikjawa. Anga indakgipa ba'rarangko gane dakgrikna man'jawachim."

"Indiba nang'ni sipairang iano dongja" ine uamang aganchakaha. Nang'o gureba dongja aro nang'ni kotok bang'a mailrang ianoni chel'a. Na'a me'tra ong'oba, me'asa gita ba'ra ganani gimin kratchabena nanga.

Bitchuma iako aganon jaktangko rimketaha aro mikgronrangko chipe, dildil gokgok ong'e rangsitnaba man'japila gita dakachim.

Joan aiao inmanpile uni aro gipinrangni aganako knatimaha aro sko rokreka. Ua me'chikrang ka'sagiparang ong'achim, indiba dakgrikani gimin uamang mamungkoba uijachim. Joan an'tang bigilchi pindapgipa ja'arangko niaha. Jakrangni bigil inditan rakachim maikai uarang gandapgipa sildangkap gita ong'achim. Gipin me'chikrangni

jakrang gipoka; jakskilrangko nate rinoka aro
jaksirango bang'a jakstemrangkoba ganachim.

Uamang pilnipil Joan baksa golpo ka'aha aro
uamang ua jontol gesako on'aha. Indiba ua unoni
joke katangna sikbeachim. Compiegne aro uano
chipgimin French sipairangko gisik ra'e, ua
sachakachim. Parischipak regipa rama dongani
gimin, Englishrang uona napangna jotton
ka'engachim. Uamang songko chapinapna
man'ode, pilak' bilsni batgiparagko so'ottokna
mangsongachim ine manderang aganachim.

Gisep gisep "ku'rangrang" uko ka'dimeatna
Compiegne obostarang pilakan namtokenga
ine uiatachim. Indiba Joan uamang baksa dongna
sikbeachim aroba una mikkangchi mai ong'gen,
iakoba ua uina skachim.

Joan jokna chanchia

Mongsongde ua ua jarango ua killaoni katangna
chanchiachim. Indiba cholko nikjachim. Uko
nokchakgipa me'chikrang ka'sagiparang ong'oba,
kuturiko simsakbee tekrongachim. Ua me'chik
sakgittam Joan baksa dongmitingo dogako
tekjachim aro gisep gisep koidi ua kuturio
dongkuengachim ine sandina, Burgundian
sipairang uchi doangachim. Ua kuturi nokni
protchong ong'achim. Uni kelki ge'sasan aro uoni

nionpae, ua namen a'aoni chuachim ine ma'sina man'achim. Pilnipil Joan ua kelki sambao chadenge nionpachim.

"Anga iano badita ru'ute donggen?" ine gisep gisep Joan ua me'chikrango sing'ronga. Indiba uamang sko rokroke: "Chinga uija" inesa aganchakrongachim.

"Anga ia biaponi ong'katon, angna mai ong'gen?"
Uamang sko rokrektaiaha.

Unon Joanna kobor sokbaaha. Englishrang uko an'tangtangni jako man'na sikbee, uko uamangna on'ode, uamang bang'a tangkarangko Burgundianrangna on'gen ine ku'rachakahachim. Iani gimin Joan bakbakan ua me'chik sakgittamo sing'aha:

"Anga Burgundianrangni koidi ong'a. Uamang mamung saloba angko Englishrangna paljawa ine anga beberaa."

Uni mikkango dal'bea kenaniko nikna man'achim aro uamangko nisingchake ua uamangko bakbakan aganchakchina dakdraatachim. Indiba uamang aganchakjaha. Unon Joan changni chang sing'taitaiani gimin, uamang jena kenengachim kakket ong'a ine aganaha. Beben Englishrang bang'a tangkarangko on'gen ine ku'rachakahachim.

"Aro Burgundianrang ua tangkarangko ra'chakgenma?" ine Joan sing'aha. Uni kusik ran'ani gimin ua kusik aganna man'brejachim.

"Angko rimode uamang angko wa'al so'gen ine Englishrang aganaha. Iako uamang dakchongmotgen ine na'simang bebera'ama?"

"Chinga Englishrangko uibreja. Chinga nang'na ka'sae dakna jotton ka'enga."

Ja dokmang re'angmanaha. Unon bite nangkari a'bachengon, Joanko Englishrangna palman'ahachim ine knaaha. Uamang hajalni hajal Englandni tangkarangko Burgundianrangna on'ahachim.

Joan ua mingsako dakna nangchongmotaha ine ma'siaha. Je cholchiba ua an'tangko naljokatna nangachim. Indiba maikai?

Killako namen tekchangtokachim. Uni jokani cholara: kelki gitan katangna man'gen. Indiba bang'a tuchakaniko pindapgipa bararagoni buduko tarioba, a'aona sokna man'jawachim, maina killa namen chuachim aro pakmao rim'ani ro'onrangba dongjachim. Indaken bilonasa mingsa chol ong'achim.

Iako dakode ua "ku'rangrangko" knachakgija gita ong'genchim ine ma'sioba, walsao ua iako chu'sokataha.

Salantian ua ku-rangrangko knae
mol'molahachim aro uko watpachina ine bi'aha.
Indiba uarang mamung saloba; salonbo ine
aganchakjaha. Unon niamko manigija dake,
salsao, sin'begipa walo aro tarakgipa balmikka
dakani somoio, ua kelki kulienda kamao
donggipa barirangko nikataha. Uarang badita
chel'achim? Ua maldona changachim aro ga akna
kenjachim, maina ua mingsakosa
chanchiengachim; an'tangko naljokatnasa. Ua
signikoba chanchijaha aro bilonaha!

Ua a'aona ga akna adita ru'utaha ine chanchiaha.
Iana agre ua mamungkoba gisik rajaha.

Pringo nokkolrang uko nike, ua siaha ine
chanchiaha. Uamang ka'sae uko detomaha aro
uni kuturiona rimangaha. Bakbakan doktor
saksako okamaha. Bang'a uni grengrang be'aha
ine pilakan chanchiaha. Indiba greng gesaba
be'jaha. Indakoba adita salrangna ua sabeaha, suk
ong'jaha aro saknaarang komirorooba uni gisiko
dongtojaha, maina unon ua an'tangko dilgipa
rongtalgiparangna bamjahani gimin, ua
an'tangko kema ka'na man'jaha. Indiba aditani
ja'mano ua rongtalgiparagoni kadimeatako
man'e tom'tomaniko man'taiaha. Ia tom'tomani
bariroroaha je somoio ua Compiegne Rongtalgipa
Martinni salo, November jani 11-gipa tarikna

skang naljokgen ine ku'rangrang aganaha. Aro ia katta bebe ong'aha.

Ua me'chik sakgittam da'o simsakbee Joanko nitimengachim, indiba ua ru'ute uamang baksa dongjawa. Da'o uko kenbegnigipa koidi ine chanchiachim aro adita antirangni ja'mano, salgroni chelkalao donggipa gipin killachi uko rimangaha. December jaona kingking uko killaoni killaona donjitaha. December 24-gipa tariko, uko dal'gipa songjinma Rouenchi rimangah: aro siaona kingking ua uano dongkamaha.

Joanko Rouenchi rimanga

Ua da'o Englishrangni jakosa dongachim maina uamang Roueno sason ka'engachim. Bang'a Burdianrangba Joan baksa ua songjinmao dongachim ine knae, uona sokbaaha. Salantian adita manderang patokni guarerang sambao tomdake aganmitue uchipak niatokengachim: ua kenbegnigipa me'tra uano donga!

Patoko andalachim aro sin'beachim. Joan lekka pora dongjani gimin, indin salko re'atna nangachim. Ua uko nitimgipa sipairangni kusikko skipana jotton ka'ana, uamang uko ka'dingstekgakachim. Gisep gisep ua uamangko am'e uamangna duk on'ahachim ine gisik ra'e, nitimgiparang uko ka'saninggija dakachim. Iana

agreba ua skal aro Saitanni nokkol
ong'chongmota ine uamang chanchiachim.

Pilnipil ua giljachi uko re'angna watpachina
mol'molachim, indiba uamang uko watna
jehakaha.

"Anga ia patokoni jokna chol man'ode katgen"
ine ua aganachim.

Changsao ua uko nitimgipa sipai saksako badiaba
biapo tekaha. Indiba gipin sipai iako ma'sie,
ripengtangko jokataha.

Joan aganaha:

"Isol angni ong'katangako namnikja!"

Iako knae saoba saoba jamano uo sing'aha:

"Ian Isolni namnika ong'a ine uigenchimode, na'a
maiko dakgenchim?"

"Anga joke katna krengtaijawachim!"

"Saoba patokni dogako nang'na kuligenchimoba,
na'a katjawachimma?"

"Na'a jara gita da'o belbelenga!" ine Joan
aganchakaha. "Saoba dogako kuliode anga
katgenchim. Ian Isolni namnika ong'a ine anga
chanchigenchim."

Iani jamano salrang, somoirang ka'sne
ka'sne re'angaha. "Ku'rangrang" uko

ka'dongatjagenchimode, ua chakchikna man'jawachim. Iana agre ka'sabegipa Gitel pangnan un baksa dongkamachim ine ua uiachim.

"Anga pilakna bate Jisuna ka'sabata" ine ua bi'samitingo, Domremyo dongon aganrongachim.

Iani gimin sipairang uni mikkango inditan ku'si ong'ako nike aiao inmanpilachim.

Roueno pangnan manderang bang'beachim aro Joan uano dongachim ine knae bang'batroengachim.

France a'songni bang'a biaprangoni manderang sokbaaha aro uamangna tuani biapba dongjachim.

Romeoniba Cardinal saksa aro una agre bishop sak dok aro dingtang dingtang Universityrangoni skia man'gipa mande sakkolgrikittam sokbaaha.

Bilsi 19 ong'gipa me'trani a'sel uamang re'batokahachim.

Bon'kamao uko February ja matchoton bichal ka'gen ine tik ka'aha. 21-gipa tariko, pringo, uko patokoniko rimongkataha aro ian patoko chipako man'chengaoni ong'katchengani ong'achim.

ODHAI 8

JOANKO BICHAL KA'A

Bichal ka'gipa Cauchon

Rouen killani rajani giljanoko Joanko bichal ka'na a'bachengaha, indiba ja'mano sambao donggipa dal'gipa dringo uko bichal ka'aha.

Joan dringo napon pilakan uko nisoengaha aro jensalo ua una donsogipa chokio asongaha, pilakan jrip dakaha.

Pilakna skang bichal ka'giparangni pamong una aganaha:

"Bichal ka'giparang nang'o sing'ode, na'a pangnan tolgija aganchakgen ine mikchetbo."

Joan mikchetna jechakaha. Ua aganchakaha:

"Na'simang ango maini gimin sing'gen, iako anga uija."

Bichal ka'giparangni dilgipa, Cauchon, aiao inmane, uko nitataha.

Ua French bishop saksa ong'achim, indiba je somoio Englishrang uni elakao napdraaha, ua uamangna chakaha.

Ua bolchagipa aro bil gnanggipa mande saksachim. Uni kuchilrang ram'a aro mikkang

bokdimelachim. Uni gisingipa mikgronrangchi
ua niwilwalrongachim. Ua gisik seng'a aro skia
man'gipa ong'achim.

Ua adita chang Joan baksa agangrikahachim aro
Joan an'tangko ua namnikjachim ine
ma'siahachim. Ua Bedfordni Duke gita Joanko
rimgen ine ka'dongahachim aro da'o uko
rim'ahani gimin ua ku'si ong'beaha. Joan skal
ong'ani gimin uko krongo kae wa'al so'na nanga
ine ua chanchiachim.

Pilakna skangba uni me'asa gita gana chinani
gimin sadie singaha.

Joan dakronga gita aganchakaha.

"Anga sipaini kamko daka. Iani gimin me'asani
ba'rako gana. Iana agre Mondoli indaken ba'ra
gana bengja. An'ching ganding chindingni gimin
chanchina nangja."

Iako ua pakkrerangko moate aganaha aro
Cauchon Joan ka'pong ong'gen ine chanchiaha,
indiba Joan kengija kimkim ong'aha.

Cauchon gipin bichal ka'gipaskarangko nie, ua
kengijagipa koidi gaora degipaba ong'a ine
nitatachi uiataha.

Joanba bichal ka'giparangko niwilwalaha.
Uamang bang'beachim aro darangba una
ka'sachakgiparang gita nikja. Una warachakna

ukil dongja aro chakgipa sakki on'giparangba dongjachim.

Un pringo sin'beachim. A'palo ta'raggipa balwa balani gimin nokningo aro sorokrangoba bilding bildang ong'batengachim.

Jöan ja'skuona sokgipa pentlong aro kangkareo kagimiñ cholako gane sin'ako uijachim.

Kurangrangni gimin sandia

Bichal ka'ani sagipa sal bakbakan badeangman'aha, indiba gipin salrango ru'ute sandie uo singaha. Singani mingprakprakko aro aganchakanirangkoba serikachim. Apsan sing'aniko sing'taitaiani gimin, Joan archbishoprang, bishoprang, bichal ka'giparang aro ukilrangna aganaha:

"Ian jarani sing'ani ong'chongmota! Indakgipa sing'anina anga bang'a chang aganchakaha."

Ru'utgijan bichal ka'giparang uni knagimin "ku'rangrangni" gimin sandina a'bachengaha, maina uamang mongsongde ia kattako knana sikachim. Joan pilnipil "ku'rangrangni" aganako gisik ra'atahachim. Changsa uo singaha:

"Dasipringo na'a ua ku'rangrangko knaahama?"

"Oe, knaaha."

"Ku'rangrang aganon, na'a maiko dakengachim?"

"Anga tusiengachim. Uarang angko de' mesaaha."

"Uarang nang'ni kuturio aganahama?"

"Anga uija. Patoko uarang aganaha."

"Na'a uarangko ja'sku dipane mettelahama?"

"Anga mittelaha, indiba anga angni palango asongengachim aro jak chopchole anga mol'mole bi'aha. Ku'rangrang angko da'al kenchakgija pilak sing'anirangna aganchakchina didiaha."

Ja'mano una mikkang pagipa Rongtalgiparangni gimin sandiaha. Uamangni mikkang, gana china, reani bewal mai? Uamangni kurang maidake gamachim?

Bang'a chang ua Domremyo salgionigipa ku'rangrangko maikai knachengachim ine talatna nangaha. Ua aganaha:

"Uarangko anga dingkario, saljatchio, pagipani bario donge knachengaha. Abachengo anga kenaha. Ku'rangrang giljanokni jakrachipakon gamaha."

Ua Rongtalgipa Katerine aro Rt. Margaretni mikkangbimangni giminba talatna nangaha. Uamang Englishrangko mitchiama?

Iako knae Joan ka'dinge aganaha:

"Uamang pilak Isolni ka'sagiparangko namnika aro pilak Isolko mitchigiparangko namnikja."

Kachario donggiparang iako knae aganmituengachim aro bichal ka'giparang Rongtalgiparangni gimin sing'taijaha, indiba uamang uni nisan aro tonualni gim'in sing'na aro sandina a'bachengaha.

"Na'a uarango bangen beberaama?"

"Ong'ja" ine Joan aganchakaha. "Anga an'chingni Gitelosa beberaa."

Ua jajagija pangnan iako ku'rachakaha:

Ang'ni bilchi anga mamungkoba dakjaha, indiba Isolsa chugimikko dakaha."

Bichal ka'giparang ia kattako namnikjaha. Uamangsko rokreke chanchiaha: Mondolini kam bao?

Uamangni nikao Joanni dos ian: Mondolini pamongrangna simsakgija, ua an'tangni kamko dakahachim. Ua papkurachakaha aro Rongtalgipa Kommunionkoba ra'aha. Indiba ua mamung saloba an'tangni kamni gimin Mondolini dilgiparang baksa agangrikjaha. Una Mondoli aro Mondolini dilgiparang dongjachim gita ongachim. Uni agana gita, ua Isolnasa bame chugimikko dangdike on'aha.

Rongtalgiparang una agana aro Isol Antangan uamangni kusikchi An'tang namnikako parakata. Isolni ge'etani gimin Joan an'tang nokko wate dakgrikna re'angaha.

"Indiba ia a'gilsako na'a Mondolina bamna nanga ine bebera jama? Na'a Popeko, bishoprangko knachakjama?" ine uo singaha.

Joan aganchakaha:

"Anga Popena ka'saa aro bil gimikchi una warachakna ska. Indiba an'ching pilakna skangba Isolna bamna nanga. Angni uia gita Isol Mondolini pangchakani onga. Angko Popeona rimangode, anga pilak sing'anirangna aganchakgen."

Cauchon ia kattarangko chuongnikjaha. Uni nikao "ku'rangrang" aro uarangni agananirang Soitanni kam aro didianirang ong'achim ine Joan ku'rachakna nangaha. Je cholchiba ua iako ku'rachakna Joanko dakdraatna aro iako dakna salantian neng'batroroengachim ine ua ma'siaha.

Joanko kamikkenata

Bang'a salrangna aro bang'a antirangna ua jotton ka'aha. Joan kimkime aro kenmangija aganahani gimin, Cauchon ka'onangako mesokjaha, indiba bon'kamao ua aro gipin bichal ka'giparang ia aganramana nengnikaha. Sin'kario Joanko bichal ka'na a'bachengaha. Da'o a'galmak kari ong'aha. Kachario manderang bang'achim aro namen ding'achim. Joanba neng'gokna a'bachengaha.

Da'o ua ka'sine ka'snesa aganna a'bachengaha aro gisep gisep aganarangna gisik mabranga gita dakachim.

Cauchon iako nike da'o gipin cholko jakkalna nangnok ine chanchiaha. Apsan kattako jotking agantaitaiode una kenjagokgni ong'gen ine ua uko kamikkenataha.

"Nang'ko wa'al so'naba donga" ine ua agandapaha.

Joan aganchakaha:

"Wal'sarerang angko pindapoba, angni bebera'ani apsan ong'gen. Minggipinko anga aganna man'ja."

Uni kattako knae kachario pilakan gisiktangtango uko dalnikaha, indiba Cauchon ka'dingsmite Joan kenmangija aro kimkime skang gitan aganchakjachim ine chanchiaha. Uni ku'rang bilgriaaha.

Bon'kamao ia bichal ka'ako chu'sokatnasienga ine ua ma'siaha aro ua Joanna ua "ku'rangrang" Saitanonisa ong'a ine agantaiaha. Isoloni ong'genchimode, Mondoli uarangni didiako ra'chakgenchim.

Mondoli ka'sachakgipa ong'ani gimin uko dakchakgen, indiba ua gisik pil'na nanga. Gisik pil'ode una sakramentrangko bakbakan on'taigen.

Cauchon Joanko nisingchake ua jechakna man'jawa ine uichong'motaha.

Ja sa badeangman'aha. Cauchon Joanko patokoniko rimange uko gopramona rimangchina ge'etaha. Ua biapo ua an'tang signiko gisik ra'e, gisik pil'chongmotgen.

Joan uamangni miksongako ma'sijaha. Manderang uko kachariona rimangna re'baaha ine ua chanchiaha. Indiba uamang uko gari ge'sao gataha. Ua gario changrogipa aro gisingipa cholako gangipa kamal saksa chadengengachim.

Balwa namachim aro Joan ru'ute patokni andalao dongani gimin balgipa balwana ku'si ong'e, aram gri salgiko aro tangsekgipa a'ani samsiko niwilwalo:

"Jakgitel ong'taigenma?" ine gisiko chanchiaha. Iako chanchie ua tom'dakgipa aro uko manenggipa manderangna simsakjaha.

Gari dongdikaha aro ua gopramko nikaha. Uni jatchio machang ge'gniko songachim. Ge'sao adita bichal ka'giparang gnang aro ge'gipino uko aro un baksa donggipa kamalko doangataha. Ua ru'ute kenbegnigipa skalrangni aro branggiparangni gimin aganaha. Unikoa Joanko jaksi ote mesoke, ua "choligijagipa aro namgijagipa me'chik" ine sao on'aha, maina ua an'tangnasa-iade ong'ja, indiba France a'songko aro mongsongde Franceni rajako kratchaatahachim.

Raja Charles Joan baksa nangrime Mondolina warachakgija uni bobilsa ong'achim.

"Anga nang'na aganenga, Joan. Anga nang'ko mikrakatenga."

Joan chadenge ua tol'e aganengachim ine ka'chae aro pegitchake aganchakaha.

"Beben, na'a tole aganchong'mota. Angni Raja Kristianrangni gisepo rasong gnanggipa ong'a. Maiba gualani dongode, angni dos ong'gen. Anga darangkoba matnanga man'ja."

Ua gambee aganaha indiba da'oba ua nombatroroengachim ine Cauchon chanchiaha aro uni chanchia gita ong'bebeaha.

Kamal aganprakmano Cauchon chadengaha aro pilak jrip dongon, ua aganna a'bachengaha. Uni mikkangko nikon pilakan kentokachim aro uko nie Joan kenan gapaha. Ua ka'sne ka'sne Joanko miktenten nie aganaha:

"Joan skal ong'a aro ua an'tangni nikanirango aro knagimin ku'rangrango beberajawa ine ku'rachakjaode, uko Mondoli a'pal galgen aro krongo kae uko wa'al so'atna nanggen."

Ua mamungkoba agangija dongengon Joan mikkangchina re'angaha aro chanchiaha: "Angko Mondoli apal galgen aro so'otgen. Uni bishoprang kakketko aganengama? Anga beben

brangahama? Ua "ku'rangrang" - ua knatogipa ku'rangrang - Soitanonisa ong'ama? Rongtalgiparangko nikaniba? Da'o anga maiko dakna nanga?"

Rang'san ua gisik pil'aha ine chrikaha. Ua brangahachim! Ua pap dakahachim! Da'o ua Mondolini aro bichal ka'giparangni tik ka'ako ra'chakgen!

Iako ua agantaitaiaha aro Cauchon ka'dingsmite lekka kingsako rimrokengachim. Ua lekkao Joanni gisik pil'ani aro dosko ku'rachakani kattako sesoachim. Da'o ua kattarangko Joanni mikkango ua poraiaha aro Joan soi ka'na nangaha.

Bichal ka'gipa saksa una aganaha:

"Joan, na'a namen dakaha."

"Uko patokchi rimangtaibo" ine Cauchon ge'eton, uko ma'nie Joanko patoko chi'ptaiaha.

JOANKO WA AL SO ATA

Ku'rangrang agantaia

Joanko Bristibar salo, Rt. Gisikni ong'onbaani salna skang bichal ka'aha. Patoko naptaiie unsalo papku'rachakna aro Rt. Komuninoko ra'na una on'gen ine ua chanchiengachim. Indiba ia sakramentrangko una on'jaha.

Iani gimin je somoio Sombaro Cauchon uko nina re'baaha, Joan gisik dingachim aro kenchakgija skang gita ka'donggipa aro mikkim gnanggipa ong'e ua uko togiahachim ine matnangaha. Uni ku'rachaka gita uko sakramentrangko ra'na on'jaha, uko apsan patoko chiptaiaha aro uko me'chikrangsa uko nitimngen ine ku'rachake ua tole' aganahachim.

"Iani gimin, Bishop, maiko agangen?" uko nitate Joan sing'aha.

Bishop aganchakjaha, indiba uo sing'aha:

"Ua ku'rangrangko na'a knataiahama?"

"Oe, knataiaha."

"Uarang mai kattako aganaha?"

Uarang indake aganaha: "Na'a an'tangko jokatna krenge an'tangko matnanga. Na'a gualaha!

Na'a ku'rachakna nangjachim." Aro uarang agandapaha: "Je kamal aganprakaha, tol'esa nang'ko sao on'aha. Na'a kenchakgija uko jripatna nangachim. Wa'al so'ana kenani giminsa na'a gualaha ine ku'rachakaha."

"Iana agre uarang maiko aganaha?"

"Isol nang'ko watatjaha ine na'a aganode, na'a noroko ga'akgen, maina beben Isol a'songko naljokatna nang'ko watatchong'motaha."

Iako knae Cauchon ku'si ong'aha. Ia kattarangchin Joan an'tangko sao on'ahachim. Da'oba ua Mondolini simsakgija, skatang dakachim.

Uni katta siatgnigipa katta ongachim!

Cauchon chadengaha aro Joanko watgale re'angaha. .

Joanko wa'al so'ata

Sal gipino Cauchon uiataha: Knalo Joanko antidamona rimanggen aro skal onгани gimin uko krongo kae wa'al so'gen, indiba sina skang ua papkurachani sakramentko aro Rt. Komunionko ra'na man'gen.

Una Komunionko on'gipa father ja'mano aganaha:

"Manderabee aro grape ua Rt. Komunionko ra'aha."

Jasku dipante ua Gitelko mittelmitingo, una bichal ka'giparangni rai on'ako uiataha.

Iako knae ua dikdiksana gisik dongsiksakaha, indiba bakbakan knatimtaiaha aro Cauchonni patokni dongachoko chadengako nike, una aganaha:

"Bishop, nang'ni a'selni gimin anga sia."

"Na'a an'tangko sao on'aha" ine Cauchon aganchakaha.

Dikdiksani ja'mano Joanko patokoniko rimangaha.

Ua pringo sal an'sengachim aro ka'singipa balwa balachim.

Joan da'o me'chikrangni ba'rako ganaha. Mande saksa uni mikkango re'e, bolpleng tongsako dedoaha aro ua bolplengo sea gnanngchim: Ia me'chik skal, beberagijagipa, ka'saninggijagipa, Soitanni nokol ong'a.

Ua bolplengko nike bang'an mikchi ong'aha.

Antidamona sokbagipa manderang una ka'sachakchina Isolo bi'aha. Joan antangna gambee bi'chakaha.

Uko krongo ka'aha. Una chisol ge'sako on'china ua mol'molaha aro English sipai saksa iako knae, Joanni ja'arango dangimin amboloniko gonggniko ra'e, chisolko tariaha aro uko una on'aha. Ua uko kudimaha aro rimkapaha.



Ja'mano giljanokni sonani chisolko ra'bae, uni
mikkango uko dedoaha aro Joan dongdikgija
uko nie dongaha.

Wal'sarerang chadoon ua Rt. Katherine, Rt. Mar-
garet aro Rt. Michaelko okamaha aro sinasion
aganna man'a dipet Jisuni bimungko
mingtaitaiaha.

Joan 1431 bilsio, May jani 30-gipa tariko, pringo
janggi galaha.

Chasongoni chasongona unsalo ua rasong chae
amsrangaha ine pilakan agantokgen.

AGANCHOTANI

Manderangni nikao, "skal" Soitanni bilchi ong'ronggijagipa kamrangko dakgipa me'chik onga.

Pilak jatrangni gisepo skal pilna mangiparang donga ine agana.

Jihudirangni gisepoba gnanngchim.
(1 Sam. 28: 3 - 7)

Ong'chenggipa Kristian Mondolioba brangatgipa memang muni pigiparang aro montol dakgiparang gnanngchim. (Wat. K. 8:9)

1484 aro 1782 bilsirangni gisepo Europeo 300.000-mang me'chikrangko skal pila ine potemung so'otaha.

Arc-ni Joanba skal ong'ahama?

Uni bobilrang aro uko bichal ka'giparang uko skal ong'chongmota ine bebera'aha.

Iani gimin uko so'otaha aro uko so'otmano, adita bilsirangna Frenchrangba uko gisik rajaha. Raja Charles VII-ba Joanni ka'donge dakarangko gualsrangaha. Indiba bilsil chikungmangni jamano ua gisik pile Joanni gimin pilakkon sanditaina ge'etaha.

Gipin manderangba Joanko bichal ka'ani bidingo sandiaha.

Gisik nangbee sandienba, 1436 bilsio, July Jao, pilakan Joan dos gri ong'achim aro uko kragija dake bichal ka'aha aro sao on'aha ine uiataha.

Iasan ong'aija. Adita bilsirangni ja'mano Frenchrang Joan a'songtango jokatnasa Isolni watatgipa aro rongtalgipa me'tra saksas ong'achim ine ma'siaha.

Mondoli Frenchrangni aganako uie, Joanni dakarangko aro aganarangko sandiataha. Sandie nion, 1920 bilsio, May jani 16 tariko, Arcni Me'tra Joanko Mondoli rongtalgipa ine aganprakaha.

Indakesa da'o Frenchrang aro a'gimikni manderang uko gisik ra'e aro mandera'e, uni mol'molchakanina bi'a.

Chibrigipa Kristian chasongo Englishrang adita France a'songni songjinmarangko ra'sekaha.

Frenchrangko dakchakna Isol me'tra saksako, Arcni Joanko watataha.

1429 bilsio Joan French sipairangko dile, Orleansoniko Englishrangko arikataha aro uni ja'mano adita gipin songrangkoba naljokataha.

Indiba 1430 bilsio Englishrangna chakgipa Burgundianrang Joanko rim'aha aro uko Englishrangni jako on'aha.

Uko skal pote Joanko bichal ka'aha aro sao on'aha.

1431 bilsio, May jani 30-gipa tariko, uko krongo
kae wa'al so'aha.

Ja'mano Frenchrang uko bichal ka'ako sandienba,
Joan dos gri ong'achim aro uko kragija dakesa
so'otahachim ine ma'siaha.

1920 bilsio Mondoli Joanko Rongtalgipa métra ine
aganprakaha.

Da'o a'gimiko Mondoli uko mandera'e rasong
chaata.

1431 bilio. May joni 30 aipa tariko uko krongo
kag wai saba miche ang ng sod non makala
Jamho French ang uko bichal ka'alo sandiba
Jama dos ki ang schim ang uko kanga daka
sod schim ito mazaia
French ang uko a'non a'non ang uko
1430 bilio Mondoli Joanko krongo mazaia
ine mazaia ang uko
aganprakaha

1430 bilio Mondoli ang mandara' rano
Do a'omiko Mondoli ang mandara' rano
kaha anata' ang uko ang uko ang uko
ang me' ang uko ang uko ang uko
Joanko Mondoli ang agipit ang uko ang uko
kaha

Indiki ang uko ang uko ang uko
mandara' ang uko ang uko ang uko
ang me' ang uko ang uko ang uko
kaha


Chobigipi Kristia chawgo Englishrang adita
France ang uko ang uko ang uko
kaha

Frenchrangka dachaka Isol me tra saksako
Arni Joanko wai'aha

1429 bilio Joan French sipairangko dile,
Okeanoriko Englishrang wai'aha ang uko
jama' adita gipi songrangoba wai'aha

Indiba 1431 bilio Englishrang chakgipa
Burgundiarang Joanko rimaha ang uko
Englishrangni joko onaha

Uko koi pwa Joanko bichal kaha ang uko ang uko
kaha







ARC-NI RONGTALGIPA JOAN

1429 bilsini May jao English aro Burgundy sipairang France a'songni songjinma Orleans-ko chadrapaha. Bang'a salrangna dakgrikani ja'mano Joan France-ni sipai kotokko chedilaha.

Orleans tom'tom ong'an baksa, Joan aro uni sipai kotok salgrochipak naproroange France-ni bang'a songjinma aro songrangko bobilni jakoniko man'pilaha. Indaken 1429 bilsini June 17 tariko King Charles VII-ko Reims-ni Cathedral-o France-ni raja ine mukut stikataha.

Adita jarangni ja'mano, 1430 bilsini May 23 tariko Joan-ko Paris-ni salgrochi ong'gipa Compiegne minggipa songo Burgundy-ni sipairang rim'gitangaha. Indaken ia bilsu chi'sku ong'gipa Joan-ko killa ge'saoni ge'saona ra'rroe, bon'kamao Rouen songjinmao Englishrangni jako pakwataha.

Joan-ko Ruen-o bichal ka'e, 1431 bilsini May 30-o montol dakako jakkalgipa me'chik ine rai on'aha. Indaken uko antidamo wa'al so'e siataha.

Joan-ni siani bilsu chikung ja'mano King Charles, una on'gimin rai, uni siani aro iano nangchappiga obostarango sandie nioa uko mamung dosgri ine uina man'aha.

Indaken Arc songni Joan-ko 1920 bilsini May 16-o Pope Benedict XV Rongtalgipa ine parakataha.



DON BOSCO PUBLICATIONS

Guwahati - 781001, Assam

Rs 15.00